



FA'ATUATUA

Fepuari 2020

Matou te mua'i fa'atalofa atu i le mamalu o le tatou Kapelanisia i lenei tausaga fou ua tatou aulia mai, malo le soifua manuia ma le lagi e mama. Malo le folau manuia i folauga ua mavae i le tausiga mamana a le silisili'ese. Fa'afetai fo'i i le fa'atamasoali'iga i faiva ma tiute fa'ale- Ekalesia sa feagai ai i le 2019. Fa'amalo le loto toa, malo le tauata'i.

O lea fo'i ua toe amatalia le tatou tautua i lenei tausaga o le 2020. Talosia ia solosolo lelei tualumaga o le tausaga i tiute fai ma galuega o le tatou savaliga o lenei tausaga. Ia fa'atasi mai pea le Agaga ole Atua e fai ma ta'iala o la tatou faigamalaga o le 2020.

Tatou te ola a tatou Fagafulu e pei o le 'au Aposetolo na 'ai'oi atu ia Iesu, "Ia e fa'atuputeleina lo matou fa'atuatua" (Luka 17: 5). Na fa'amanino lelei mai e Keriso o le aofa'i o lo latou fa'atuatua e le afaina. "Afai ua tusa lo outou fa'atuatua ma le fua o le sinapi" e mafai ona latou faia ni vavega maoa'e. O le mea ua fa'aali mai e le Ali'i o le "aofa'i" o lo tatou fa'atuatua e le t'aua ae o le *ola ai i le fa'atuatua*.

O le auala e galue ai le fa'atuatua

O le ā le uiga o le "fa'atuputeleina lo matou fa'atuatua"? O lona uiga o le au aposetolo, e ala i lo latou fetaiā'i ma Iesu Keriso, ua mautinoa o lo'o i ai se mea o lo'o misi i o latou olaga ma o Iesu o le tali. E fa'apea ona galue le fa'atuatua. O le fa'atuatua e le amata i totonu o tatou; e amata i fafo atu o tatou. E amata mai i se mea na pu'epeina e o tatou va'ai ma fetaiā'i ma o tatou manatu, mafua'aga, o tatou loto, ma sa'olotoga. O nei tagata e toasefulu-lua sa fa'atasi ma le Ali'i a o ia fa'amalōlō tagata mama'i (Lk 7: 1 – 10), na toe fa'atū mai le oti (Lk 7: 11 – 17); fa'amagalo agasala (Lk 7: 36 – 50), fa'amalū le afā i luga o le sami (Lk 8: 22 – 25), tuli 'ese temoni (Lk 8: 26 – 39); 9: 37 – 43), fa'ateleina falaoa mo le motu o tagata (Lk 9: 10 – 17), ma a'oa'o ina le mana o fa'ata'oto. "O le matagofie o le fa'atuatua" e pei ona tusia e Pope Penetito XVI, e le'ona ou te feiloa'i atu ai i se manatu na mafaufauina, ae o se mea ua ou feiloa'i atu ai i ai ua sili atu i lo se isi lava mea ua tatou mafaufau i ai mo tatou lava."

I le molimauina o le anoano'i o galuega matagofie a Iesu Keriso na lagona ai e le 'au aposetolo e leai so latou malos'i'aga fa'apea. Ua latou va'aia ia Iesu se mea e le'ona i latou. Ma na latou fia mauaina. E le'ona gata i lea sa manana'o ina ia maua atoatoa le Tusi-tala o nei matagofie. Fa'atasi ai ma le 'au aposetolo, ua tatou iloaina e le'ona o le mana'ona'o ua tatou maua; o *tatou* o mana'o-oga. Ina ia avefa ma tagata e anoanoa'i se fiafiaga fa'atalitali mo le fa'avavau e latalata mai i o tatou olaga ma tauave o tatou e āna.

O le uiga nei o vavega a Iesu. O mea na folafolaina. O mana'oga o le olaga e le'i gaosia lenei Fa'atasiga Fa'apitua, ae ua tatou mafai ona fa'ailoa. O latou e le'ona malamalama i lenei mana'oga e le'ona lagonaina le fa'anaunau e sa'ili le fa'atuatua.

Ola i le fa'atuatua

O le 'alaga e "fa'atuputeleina o tatou fa'atuatua" o se fa'ataunau ina ia tatou mafai ona *lagonina o tatou mana'oga* loloto, fa'amaoni, atoatoa. O se tatalo ua talosaga: A feagai ma o'u mana'oga – ma mana'oga o a'u lea – 'aua ne'i fa'amāsiasia ai a'u, pe faia ni fa'aupuga e 'alofia ai, pe tineia fo'i, pe fa'amoemoe ia ia lava e feagai atu i ai. Ia avefa lo'u nei iloaina o o'u lava mana'oga ia una'ia ai a'u e fa'atalanoa ai a'u ia te "oe i le agaga maulalo ma le fa'amoemoe. Mo le "loto mafanafana" o lona uiga "ma le fa'atuatua."

Ua tatou fa'atagisia mo se fa'atuatua tele o se taumafaiga lea e fa'aoga se fa'atuatua ua tatou maua mo so tatou lelei. O le mea lea, o le ola i le fa'atuatua ole tineia lea o le ola ai i mea "ua tatou mafaufauina mo tatou lava." O lona uiga tatou te le'ona toe manana'o e ole e pei ona tatou manatu i ai, o tatou fa'alogo'aga, po'o manatu. Afai tatou te fa'amaoni e ole ai i le fa'atuatua, ona manatu lea e le'ona ile ita, o manatu oso vave ma fa'aosoosoga. E le taupulea i tatou e le manatu fa'apito ae e ole e pei o le mana'oga o le isi Tagata: "Auā o lo'u ola ua ia Keriso lea" (Filipi 1: 21). O le "Fa'atuatua" e pei ona fai mai ai Pope Penetito "e mana'omia lo tatou olaga atoa, malamalama, tatou loto, o tatou fa'alogo'aga, o tatou alofa. E mana'omia le tu'uina atu o tatou lava. E a'afia ai vaega uma o tatou olaga, o tatou tagata atoa." I lenei 'auala, o le "fa'atuatua ole oti o le tagata fa'atauva'a ma le toetū o le 'e moni."

E i ai se tala sa fa'amatala e se tasi o ali'i i se Seminalio. Fa'apea i se tasi o pitonu'u sa iai le taimi umi e le'i maua se timu ma na talosaga le faife'au i tagata o le palisi ina ia faia ni tatalo mo se timu. Ile fa'ai'uga o le vaiaso, sa potopoto ai tagata i se malae e latalata i le falesā e fa'afetaia le Atua ina ua talimai ia latou tatalo. Na talosaga le faife'au i tagata e aumai ni mea e fai ma va'aiga o la latou fa'atuatua i le Atua. O le tele o tagata o le palisi na o mai ma Tusi Pa'ia, fa'atua o sagato, losalio ma koluse. Ae tasi lava si teneitiiti na alu atu ma se fa'ailoga na iloaina ai ua sili atu lona fa'atuatua i lo tagata uma sa i ai. Na alu atu ma se fa'amalu!

AFIOGA KATINALE JOHN DEW



UŌ PELEINA

I le aso o le Sulufaga o le Papatísoga o le Ali'i, sa ou ta'ita'ia ai le Misasa mo le Fa'apopotoga a Focolare (Focolare Community), e 350 tagata mai atunu'u o Oseania sa fa'atasi atu i le nofoaga i El Rancho mo le latou fa'atasiga ua ta'ua "Mariapolis" mo le lima aso. O se aso matagofie mo tomanatunatuga i o tatou

Papatísoga ma le vala'au ia avea ma "misiona" i lenei tausaga i le pule'aga atoa ma le fa'amoemoe e mafai ona tatou tomanatunatu i le uiga o a tatou Papatísoga ma ua vala'auina i tatou ina ia tatou malamalama atili i le tulaga ua fa'atonunia ma fa'amanuaina ai i tatou e avea ma Misionare. Manatua upu nei a Iesu sa fai mai iā i tatou uma: **"O lenei, ia outou o atu e fai nu'u uma lava ma so'o ma papatiso atu iā te i latou i le suafa o le Tamā, ma le Atali'i, ma le Agaga Pa'ia."** (Mataio 28: 19). E le mafai ona tatou faia lea vaganā ua tatou matuā iloaina o a tatou Papatísoga ua faia i tatou ma **"afafine ma atali'i alofagia a le Atua."** I lenei Papatísoga "O le alofa atoa" a le Tamā o

le a i luga o Iesu. "O le alofa atoa" a le Atua o le a i luga o tatou, o ana fanau.

E pei ona i luga o tatou faiga lelei a le Atua, o la tatou tali o le tu'u atu lea o tatou i lona agalelei ma le iloa o lona alofa e leai sona tuā'oi. O le moni lenā e tatau ona a'afia ai mea uma tatou te faia i o tatou aiga, a'oga, kolisi ma palisi. A tatou malamalama i le anoanoa'i o le alofa ole Atua iā i tatou, o lo'o tapasāina ai a tatou mafutaga ma isi auala tatou te mafaufau ai po'o a mea tatou te faia mo a tatou fa'apopotoga. Tatou te ola mo isi, ma iloaina o latou mana'oga ae lē na o tatou lava; tatou te manatu i le lotu lau'itele ma mana'oga a le palisi atoa ma le pule'aga ae lē na o tatou fa'apopotoga.

I lenei tausaga, tomanatunatu i mea na faia e a outou Papatísoga mo outou lava, tu'u atu le tou va'ai i le Atua e alofa iā te 'outou, e pei ona silasila mai le Atua iā i tatou, alofa ma silasila mai i le alofa e aunoa ma se fua.

I lenei tausaga filifili ina ia va'ava'a ma fa'amalieina i le atoaga o le Atua.

Ma fa'amanuia uma mo 2020

+loane

O LE FE'AU O LE FAGAFULU O LE 2019 MAI LE TAMA PA'IA POPE FARANISISI

"Auā o lo'o fa'atalitali mea uma na faia ma le naunau i le fa'aalia mai o atali'i o le Atua"



Mo Uso ma Tuafafine

I tausaga ta'itasi, e ala i le Ekalesia le Tinā, "ua aumai e le Atua iā i tatou lenei vaitau fiafia pe a tatou sauniuni e patipatia le misitelio o le paseka i le mafaufau ma le loto fa'afouina...a o tatou toe manatunatu i mea tetele na tutupu na aumaia iā i tatou se olaga fou iā Keriso. Ona tatou faimalaga mai lea i le Eseta aga'i atu i le fa'ataunu'uina o le fa'aolataga ua tatou talia ona o le misitelio

fa'apaseka a Keriso – "Auā e fa'aolaina i tatou i le fa'amoemoe" (Roma 8: 24). O lenei misitelio o le fa'aolataga, o lo'o galue iā i tatou i taimi o tatou olaga fa'alalo nei, o se gasologa malosi o lo'o sapaapaia le tala'aga ma le foafoaga atoa. E pei ona fai mai ai Paulo, "Auā o lo'o fa'atalitali mea uma na faia ma le naunau i le fa'aalia mai o atali'i o le Atua" (Roma 8: 19). I lenei vaiaga ou te mana'o e ofo atu ni nai tomanatunatuga e fa'atasi iā tatou faigamalaga o le fa'aliliuga i le Fagafulu o lo'o lumana'i nei.

O le fa'aolataga o le foafoaga

O le patipatia o aso e Tolu o le Paseka o le pasio, maliu ma le toetu o Keriso, o le fa'atumutumuga o le tausaga fa'alelotu, ua vala'auina i tatou i tausaga ta'itasi e faia ni malaga o le sauniuniga, i le iloa o lo tatou 'au ai fa'atasi ma Keriso (cf. Roma 8: 29) i mealofa e leai sona tau, o le alofa o

le Atua.

A tatou ola e pei o fanau a le Atua, toe fa'aolaina, ta'ita'ia e le Agaga Pa'ia ma e mafai ona fa'ailoa ma usita'ia le Tulafono a le Atua amata mai i le Tulafono na tusia i o tatou loto ma le natura, ua tatou fa'aleleia ma le foafoaga i le galulue fa'atasi ai i lona fa'aolataga. O le mafua'aga lenā na fai mai ai Sagato Paulo o lo'o fa'anaunau le foafoaga mo le fa'aaliga a fanau a le Atua; i se isi fa'aupuga, o latou uma ua olioli i le kalasia o le misitelio fa'apaseka a Iesu o le a a'afia i lona fa'ataunu'uina i le fa'aolataga o le tino lava ia. Ina ua suia e le alofa o Keriso olaga o le 'au pa'ia i le tino ma le agaga, ua latou avatu le vi'iga i le Atua. E ala i tatalo, tomanatunatuga, ua latou a'afia ai ma isi meaola i lena vi'ivi'iga, e pei ona tatou va'aia o fa'amatala i le "Pese a Meaola" na tusia e Sagato Faranisisi o Assisi (cf. *Laudato Si* 87).

O LE FE'AU O LE FAGAFULU O LE 2019 MAI LE TAMA PA'IA POPE FARANISISI

Ae i lenei lalolagi o le gasologa lelei e afua mai i le fa'aolataga e masani ona fa'amata'uina e le malosi leaga a le agasala ma le oti.

O le malosi o le taufa'aleaga a le agasala

loe, a tatou le ola ai e pei o fanau a le Atua, e masani ona tatou faia ni amioga taufa'aleaga aga'i i o tatou tuā'oi ma isi meaola – ma tatou lava fo'i – talu ona tatou manatu ma le iloa e mafai ona tatou fa'aogaina i latou. Ona tula'i mai lea o le lē taofiofi ma le lē onosa'i: ua amata ona tatou ola i se olaga ua sili atu i lo mea ua fa'atulagaina e le natura ma tulaga fa'aletagata. Ua tatou tu'u atu i tatou lava i fa'anaunauga ma mana'oga tu'u sa'oloto o lo'o fai mai ai le Tusi o le Poto o se faiga e lē tatau, latou ua faia e aunoa ma se mafaufau mo le Atua po'o se fa'amoemoe mo le lumana'i (cf. 2: 1 – 11). Vaganā ua tatou va'ai aga'i i le Eseta, aga'i i le tafa mai o āta o le Toetū, o le manatu fa'alemafaufau i le fa'aupuga "*Ou te mana'o uma i ai ou te mana'o ai nei!*" ma "*O le tele e le lava lea*", o le a manumalō.

O le a'a o mea leaga uma, e pei ona tatou iloina, o le agasala, mai lona amataga sa fa'aleagaina ai lo tatou feso'ota'iga ma le Atua, ma isi ma le foafoaga fo'i ia, o lo'o feso'ota'i i ai i se faiga fa'apitoa i o tatou tino. O le motusia o le tu'u fa'atasia ma le Atua ua fa'apea ona fa'aletonu ai le feso'ota'iga matagofie ma le si'osi'omaga ua vala'uina ai i tatou e ola ai, ua tutupu ai la'au afi i le fanua. (cf. Kenese 3: 17 – 18). O le agasala ua fa'apea ai le tagata ua avea o ia, ua va'aia o ia o se ali'i ma fa'aoga ai, e lē mo mafua'aga na finagalo i ai Lē na Foafoaina ae mo lona lava ia lelei, i le fa'aletonu o isi meaola.

Ina ua avea ma Tulafono a le Atua, le Tulafono o le alofa, ua tineia, ona avea lea o le Tulafono o lē malosi ua pulea ai lē e vaivai. O le agasala o lo'o nofo i le loto o le tagata (cf. 7: 20 –

23) e fuafuaina le mana'o tele ma le lē fa'amaoni i le sa'iliga o le lelei, ma le leai o se manatu mo le lelei o isi ua o'o lava ia te ia lava. Ona ta'ita'ia lea i le fa'aogaina lē tatau o le foafoaga, o tagata ma le si'osi'omaga, ona o le mana'o ua lē fa'amalieina ua va'ai ai i fa'anaunauga uma o se aiā tatau ma e ono fa'aleaga uma ai i latou o lo'o i ona lima.

O le mana o le fa'amaloloina, salamō ma le fa'amagaloga.

E mana'omia vase e le foafoaga le fa'aaliga a fanau a le Atua, ua faia o ni "foafoaga fou". Afai "O iā Keriso se tasi, o le tagata fou ia; ua mavae le ola tuai, fa'auta, ua o'o mai le ola fou" (2 Korinito 5: 17). loe, i le fa'aalia o latou lava ia, o le foafoaga ua patipatia le Paseka, ona iloa lea o le lagi fou ma le lalolagi fou (cf. Fa'aaliga 21: 1). O le ala atu i le Eseta ua fa'atonuina ina ia tatou fa'afou o tatou foliga ma loto e pei o Kerisiano e ala i le salamō, liliuga ma le fa'amagaloga, ina ia ola atoatoa ai i le anoanoa'i o kalasia o le misitelio o le paseka.

O lenei fa'anaunauga, se mana'oga mo le foafoaga atoa, o le a fa'ataunu'uina i le fa'aaliga o fanau a le Atua, lona uiga, pe a ulufale atu Kerisiano ma tagata uma i le mafatia ma le faigatā e mana'omia mo le liliuga. O foafoaga uma ua vala'uina, fa'atasi ma i tatou, ina ia savavali i luma "mai le tu'usaunoa ia lava mea na faia ia lē fa'apologaina e le i'u vale, ae o'o i le sa'olotoga o le fanau a le Atua e manuia ai" (Roma 8: 21). O le Fagafulu o se fa'aaloga fa'asakalameta o lenei talanoaga. Ua vala'uina Kerisiano ina ia fa'alolotoina le fa'atino o le misitelio o le paseka ma fa'amausalī i o latou olaga fa'aletagata, fa'aleaiga ma olaga fa'asosaiete, aemaise le anapogi, tatalo ma le limafo'ai.

Anapogi, o le taumafai lea e suia o tatou uiga aga'i atu i isi ma le foafoaga atoa lava, liliu 'ese mai

fa'aosoosoga ae "folo" mea uma ina ia fa'amalie ai le tu'inanau ma sauni atu ai e puapuaga mo le alofa ua mafai ona fa'atumulia mea ua gaogao i o tatou loto. *Tatalo* ua a'oa'oina ai i tatou ina ia lafoa'i atua pepelo ma le mimita o tatou loto, ma fa'ailoa lo tatou mana'omia o le Ali'i ma lona alofa. *Limafoa'i*, a o tatou sosola mai le fa'aletonu o le fa'aputupu o mea uma mo tatou i le talitonuga e lē moni e mafai ona fa'amautu se lumana'i e le totino iā i tatou. Afai tatou te maua le fiafiaga i fuafuaga a le Atua mo le foafoaga ma tatou ta'itasi, o le alofaina o ia, o tatou uso ma tufafine, ma le lalolagi atoa ina ia maua i lenei alofa le fiafia moni.

Uso ma tuafafine, o le vaitau o le "fagafulu" o le fasefulu aso sa nofo ai le Alo o le Atua i le vao o le foafoaga ma o se taunu'uga ina ia toe faia lea o le togala'au o le fa'atasi ma le Atua muamua atu i le ulua'i agasala. Ia avea la tatou Fagafulu o lenei tausaga o se faigamalaga i le auala lava e tasi, aumaia le fa'amoemoe a Keriso i le foafoaga, ina ia "fa'amoemoe ia tu'usaunoa ia lava mea na faia ia lē fa'apologaina e le i'u vale, ae o'o i le sa'olotoga o le fanau a le Atua e manuia ai" (Roma 8: 21). Ia tatou aumai lenei vaitau o le kalasia ina ia uia o tatou tagata. Ia tatou talosaga atu i le Atua e fesoasoani mai ma fofola mai se ala o le fa'aliliuina. Ia tatou lafoa'i o tatou manatu fa'apito iā i tatou lava, ma liliu atu iā Iesu ma lana Paseka. Ia tatou tutū fa'atasi, uso ma tuafafine matitiva, fa'asoa o tatou 'oa fa'aleagaga ma le fa'aletino ma latou. I auala ia, i le fa'aulufale mai le manumalō a Keriso i le agasala ma le maliu i o tatou olaga, o le a tatou fa'asusulu atu ai le mana o le suiga i le foafoaga atoa uma.

Mai le Vatikano, Sulufaga o Sagato Faranisisi o Assisi.

O LE EKALIESIA MA LANA GALUEGA TALA'I

E fiafia lava e toe fa'atalofa atu ile mamalu ole Kapelanisia Samoa i Ueligitone i lenei tausaga fou o le 2020. O le fa'aauuina lenei o le fa'aliliuina o nisi o tusitusiga ile Gagana Peretania e uiga ile, *Galuega Tala'i a le Ekalesia*, e pei ona amata mai ai ile masina o Oketopa. Matou te talosia e iai se aoga mo tatou uma ta'ito'atasi i tiute ma faiva o auaua ma galulue ai.

...saunia e Lauano ILAOA

(Vaega Tolu) – fa'aauu mai Tausaga ua tuana'i

O le ā se mea tatou te faia e maua ai le ola e fa'avavau? E fa'apefea ona tatou maua le fiafia ma le olioli? O le tatou tali e lē tatau ā 'ona se'e 'ese mai ma le a'oa'oga a lo tatou Matai. O le maua ole fiafia ma le olioli, e mana'omia ai i tatou ina ia alofa atu ile Atua ma le loto atoa, ma o tatou agaga atoatoa, ma lo tatou malosia ma le loto atoa, ma ia tatou alolofa atu i ō tatou tua'oi e pei o i tatou lava. Ae fa'apefea ona tatou faia lea tulaga ma le ato'ato'a?

O le tala ile Samaria agalelei, o se fa'ataita'iga lea na tu'uina mai e le Alii o Iesu mo tatou. O le tagata alu malaga, na ia tu'ua le Mauga o Siona ma alu ifo ai ile vao o le mau vevesi ma le lalolagi o faafitauli ma le femumia'i. Sa le'i pine ae osofa'ia o ia e tagata faomea. E fa'apena tonu lava le tulaga ua iai tagata o aso nei, ia ua le o toe talitonu, ma ua se'e 'ese mai mea pa'ia, ma fa'apea ona goto uga ifo ai i lea aso ma lea aso, ile vanu loloto o le lē mautonu ma le femēmēa'i. E iai tagata faomea latou te gaoia ma fao fa'amalosia a na meatotino uma, sei'a oo ina tu'ua ai na o ia ma avea o se tagata ua tu'ulafoa'iina. Sa fa'atuai ma tolopō le malaga a le Samaria ae fesoasoani ile tagata'ese. E fa'apea le mea na faia e le Alii o Iesu, e auala i lona maliu. Sa ia fufulu i tatou uma i le toto ma le vai na puna mai lona itu i luga ole Koluse.

Ole aso na sos'o ai, sa tu'uina atu ai e le Samaria ile pule ole faletalimalo tupe siliva e lua, ma ia fa'atonu atu e tausi ile tagatama'i. Na totogi e Iesu i luga ole koluse le fa'amaloloina ma le fa'aolaina o tatou. Ua nofo sauni o ia e totogi o tatou fa'aletonu ma aitalafu uma ona ole agasala i lea aso ma lea aso.

O le a se a'oa'oga o lenei tulaga mo tatou uma ua vala'uina mo lana galuega tala'i? E na ole alofa lava e mausalī ma lelei lona fa'avagelina. O le aumaia lea ole tagata soifua ina ia latalata atu ile matalasi ma le lelei ole fa'aolataga a le Atua, e auala ile fa'atuatua ile Keriso. Ole Samaria, e lē tuto'atasi lona lelei. Ua lelei o ia, ona ole lelei silisili'ese ole Atua, lea e mafai ona tatou maua ma feso'ota'i i ai e auala ile fa'atuatua.

O le tatalo "Lo Matou Tama e..", e sili atu lona loloto ma le taua nai lo se tatalo masani: e pei ona fa'amatalaina e le tusitala o Tertullian, "... o se tu'ufa'atasiga lea ole Talalelei ..", auā foi tatou te maua uma iai talitonuga fa'avae ma le autū, fa'apea ma fa'amoemoega loloto ma mana'oga aupito taua ole au sos'o o Iesu, o e sa tala'i ma fa'amalosia atu i tagata uma, ina ia liliu, fa'atuatua ma talitonu ile Atua, ole Tamā e fa'avavau lona alofa...

Ole tatalo e tumau ona avea ma feso'ota'iga vava lalata ole tagata ma le Atua, o le feso'ota'iga ma Iesu Keriso ile Agaga Paia. Ole Matou Tama ile Lagi, ole 'oto'otoga lea po'o se tu'ufa'atasiga pu'upu'u foi ole Talalelei, o loo fa'ailoa mai ai

mo tatou uma le tulaga e tatau ona fa'atino ai le feso'ota'iga lenei atoa ma le tala'iga e fa'apogai mai ai. Ole kalasia e liliu ai le tagata ile Atua le Tamā, ua mafai ai e tatou uma ona soifua o uso ma tuafafine ma tuagane. O le tiute foi e ava ma fa'aaloalo ai ile suafa ole Alii le Atua, e a'afia ai tatou uma, ma lona kalasia ile fausia o lona Malo. O le fa'amanuiaga foi ole fa'amagaloga, ua ofoina mai e le Atua o Iesu Keriso, ua tatou mautinoa ai le taua ole taumafai e u'una'ia ma fa'amalosia faiga talafeagai mo le fa'aleleiga.

Ole tulaga tamā ole Atua, e pei ona fa'ailoa mai e auala ia Iesu Keriso, ua avea ai ma au aiga moni o i latou uma ua fai ma sos'o tala'i ole Talalelei. O le avea ai o Iesu ma se tasi na sau mai le Tamā ma e toe foi atu ile Tamā, ua fa'apea ona tatou auai fa'atasi ma la i lana misiona ma lana tala'iga. O le misiona lea ma le tala'iga o lana Ekalesia mo le fa'aolataga ole lalolagi. Afai o tamā uma e tupuga mai ile Atua (Eperu 3:14-21), o lona uiga i totonu ole Ekalesia o lona Alo, e toe fa'afouina e le Agaga Paia ole Alii Toetu atalii ma afafine uma ole Atua e tasi e auala ile papatisoga. Ole Malo ole Atua, e pei ona fa'apogai ai le Alii o Iesu ile Paseka, e maua lona amataga ma lona fatu i le lalolagi nei i lana Ekalesia.

E tele ma anoanoa'i fa'ata'ita'iga i totonu ole Talalelei, e atagia ai le feso'ota'i atu o Iesu i isi tagata i se auala faaleuo ma mafutaga vavca lalata. O le molimau a Luka, o loo manino ai uiga alofa ma le manatu mamafa ole Alii o Iesu i tagata mamai e pei o lepela, o e le atoatoa le malosia, pipili ma tauaso, ae fa'apea foi o tagata agasala, o le au ao lafoga, o fafine ua oti a latou tane, o tagata sa ulutinoina e temoni, o ē ma'i maliu, ...e matua tele le lisi, ...Sa leai se tuaoi o le ofoina atu o lona a'ao mafola ole alofa ma le agalelei fa'aleuo mo sos'o se tagata.

Ole fa'auō ma le Keriso, o lona uiga ole mafuta vava lalata ma le Matai, atoa ai ma se olaga i totonu o Keriso. Ole mafuta fa'aleuō ma Keriso, e tusa po'o taimi o ma'i ma le lē ato'atoa ole malosia, tatou te maua ai le malosia mai uiga inosia, ma vaivaiga ole tino atoa ma le mau uiga leaga uma. O le mafutaga fa'aleuo, "e sau mai le loto", e fa'aali atu ai e le tasi i le tasi le mea tonu o lo'o i lona loto, i se tulaga ua faia ma le talitonu atoatoa ma le fa'atuatua e laugatasia ai laua. O le fa'atupuina ole alofa fa'aleuō, e mafua ma tupu mai ile vafeagai ai o itu e lua. O lenei tulaga ua tatou iloa ai le a'afia o lo tatou vafeagai ai ma le Atua ae fa'apea o tatou tuaoi. Ole a fa'aosofia tagata e mulimuli ile Keriso pe afai latou te iloa e iai se a'afiaga o lo latou va fa'aleuō ma se sos'o tala'i ole Talalelei.

Ole tatalo, pe a faia ma le fa'amaoni, e matala ai ma amata se mafutaga fa'aleuo ma le Atua agai i le tuaoi ma fa'apea ona u'una'i ina ai tatou ile galuega tala'i. Tatou te tatalo mo tatou lava mana'oga aemaise o mana'oga o isi, e auala ile Ekalesia ua avea ai i tatou ma ona itutino e auala ile Agaga Paia ole Atua le Tamā ma le Eukalisia ua tatou aai iai. E masani ile Tama Paia ia Pope Falanisisi, ona ia fa'aogaina se faataitaiga faigofie e fa'amatalaina ai le tala'iga: " Ole Tala'iga, sa laualuga ile finagalo o Iesu ma klona au sos'o". O lona uiga o lea mea, o soo se misionare tala'i sa ia maua le mafutaga vava lalata ma Iesu, e mautinoa lona fia fa'ailoa atu i isi tagata i se faiga vava lalata fa'aleuo, o mea uma ua ia te ia, ona o le mafutaga ma le Alii o Iesu.

(Fa'aauu ile isi lomiga e soso'o ai).

PHOTO GALLERY



**Misasa
Fa'ai'u
Kapelania
2019**



**Autalavou
Kapelania**



**Sulufaga Sagata Ana
Autalavou Tesema 2019**



Autalavou Camp 2020



O LE FĀGAFULU MA ONA SAUNIGA

Fa'aliliuina mai tusitusiga a John F Baldovin SJ, ole Polofesa o le Tala Fa'asolopito ma Mataupu fa'a-Telosia o Sauniga Lotu, i le A'oga fa'a-Telosia ma Tofiga a le Kolisi o Posetone i Amerika (*Boston College School of Theology and Ministry, USA*). Na muai lomina lenei tusitusiga ile Gagana Peretania i le nusipepa a le Ekalesia o le Pastoral Review Vol 16 mo Ianuari/Fepuari/Mati 2020.

..saunia e Lauano ILAOA

O le Fāgafulu (Lent), o le vaitaimi aupito taua tele lenei mo le fa'afouina fa'aleagaga. Auā, e ui lava ina saunoa manino mai le Aposetolo o Paulo, 'Fa'auta, o lenei le tausaga e talileleia mai ai; fa'auta, o lenei le aso e fa'aolaina ai' (2 Kor:6.2), ae o tausaga uma lava, ua tatou te fa'atulagaina ai le vaitaimi fa'apitoa o le fa'afouga fa'aleagaga atoa ma le fa'afouina o mea uma, e tatou te fa'atino ai tapenapenaga ma sauniuniga mo le fa'afouina o tatou olaga masani aemaise o folafolaga o lo tatou papatisoga, fa'apitoa lava i le taimi o le Eseta. O le ki lava ia manino i ai, e ui o le fa'aliliuina ato'aato'a o se tiute e mafai ona fa'atino i aso uma, ae o le vaitau o le Fagafulu, e tatou te fa'atinoina ai ma faia fa'atasi ia sauniga.

O lenei maopoopoga o le vaitau o le Fagafulu, na saga fa'amautūina i le Fa'avae o Sauniga Paia a le Vatikano II, lea na toe fa'amamaluina ai tu ma aga ua faitau senituri talu ona i ai, o le fa'ailogaina ma le fa'amamaluina o le Fāgafulu, e auala i le fa'aopoopoina lea i ai o le vaitau o mea fa'atigā. O lea tulaga, e le o se mea fou, ae o le toe fa'atulai mai o se tu ma se aga sa masani ai le Ekalesia anamua. O le Fāgafulu lā, ina ua toe fa'afouina ma fa'aato'aato'a lona tulaga i le mae'a ai o le Vatikano II, e lua lava ona vaega autū. O le mea moni, o le Fa'asologa Masani o Sauniga lotu fa'a-le-Tausaga Lautele, ma le Kalena Lautele fa'a-Roma, e fa'amamafaina ai le Fāgafulu o se vaitaimi o sauniuniga mo le fa'amanatuina o le Pasikate e i latou o le a sauni e talia sakalameta paia, (e pei ole papatisoga, kofilimasio, ma le Eukalisitia), ma lona lua, e mo isi tagata uma e aofia ai ma tatou, e toe manatunatu mamafa ai ma fa'afou o tatou papatisoga ma salamō ma faia amioga togisala.

Atonu e aogā, sina fa'amatalaga pu'upu'u e saga manino ai ma malamalama lelei i le natura o le Fāgafulu ma ona sauniga aloaia. E pei ona silafia, o le fuainumera o le fāsefulu e tāua tele i le Tusi Paia: fāsefulu aso o le lolo e pei ona fa'amauiina i le tusi o Kenese, fāsefulu tausaga o ta'asē i le vao le nu'u o le Atua i le tusi o Esoto, fāsefulu aso na fa'alāina ma fa'amatelāina ai le Alii o Iesu, e pei ona fa'amauiina i Evagelia autū uma o le Talalelei, fāsefulu aso na va ai le Toetū o Iesu ma lona si'itiaga mamalu i le lagi, e pei ona fa'amauiina i le tusi o Galuega a le au Aposetolo. Na amata mai i se vaitaimi o le ogatotonu o le senituri e fa, ona fa'ataitai le Ekalesia i le fāsefulu o aso na fa'alāina ai Iesu, i le fa'atinoina o ana sauniga o le Fāgafulu. E lē o matuā lauiloa tele, ia le mea moni, e muamua atu i le Fāgafulu, ia tapenaga ma sauniuniga mo le fa'amanatuina i tausaga uma, o le Misitelio o le Pasikate. O le senituri e lua, na amata mai ai ona fa'amamalu le taimi e lua aso e fa'alāina ai le Ekalesia, a'o lei fa'ailogaina le sauniga o le Paseka Kerisiano (o le maluu ma le toetū o le Alii). O lea lua aso o le fa'alāina sa toe fa'aopoopoina ma o'o ai ina tasi le vaiaso atoa o le anapogi, a'o lumana'i ai le Eseta (le Vaiasosa Sili po'o le 'Vaiaso Tele', e pei ona ta'ua ai i atunuu Kerisiano i Sasa'e). O nisi

fa'amaumauga, e atagia ai, na o'o i le tolu vaiaso le umi o fa'alāina nei i totonu o Roma (ma atonu foi sa fa'apea ma Ierusalem), a'o lei o'o mai i le senituri e fa.

O fea tonu a lā na mafua mai ai le taimi e fāsefulu aso o le Fāgafulu, e pei ona tatou i ai nei? O le tu'ufa'atasiga o saili'iliiga ma su'esu'ega a se tasi o Faifeau ua maluu o le Ekalesia Agelikana, e igoa ia Thomas J Talley, ua atagia ai, o le taimi e fāsefulu aso e fa'alaina ai e fa'ataitai i le umi na fa'amatelaina ai Iesu, sa amata fa'amamaluina i totonu o Aukipito i lona lua o senituri, ma fa'apea na amata lona fa'amamaluina i le tuana'i ai i le Epifania. O Aikupito, sa fa'ataua e latou le Epifania, e fa'apea o le taimi lea o le Liutinotagata o le Alii, ma e talu ai o le Talalelei a Mareko e mātete i mea tutupu i totonu o Aikupito, ma e leai ni ana fa'amaumauga e tusa o le Aiga Paia ma le Tamameamea i le Falemanu, o lona uiga o le papatisoga, o le fa'aailoga o le Liutinotagata o le Alii.(Peitai, o ia talitonuga, e tele ni suiga na aliali mai ai ona mea tutupu ma fa'afinauga i le va o e talitonu i le Tasi Tolu Paia ma Keriso Iesu, i lona fa ma lona lima o senituri).

O lo'o fa'amamafaina foi e Thomas J Talley, e fa'avae i ni pine fa'amau lavelave, e fa'apea, o le vaitaimi lenei o le Fāgafulu sa le'i muta i le taimi o le Eseta, ae sa o'o atu lava i le Aso To'onai o le Papatisoga o Lasalo, lea e soso'o ma le Aso Sa o le Palema po'o le Lau Pama, e pei ona fa'amanatuina ai pea i le Kalena Pisanitina (Byzantine Calendar). O le fa'atinoina o sauniga a isi ekalesia mo latou tofiga i le vaitaimi o le Eseta, sa fa'apea ona toe fetu'una'i ai e le Ekalesia i Aikupito le taimi e fāsefulu aso e fa'alāina ai, a'o lumana'i ai le Eseta. O se molimau ola i lea tulaga, o se fa'amaumauga i tusitusiga a se tamaiti malaga mai Sisifo, e igoa ia Akeria (Egeria), o loo fa'amatalaina ai le fa'alāina e fāsefulu aso i totonu o Ierusalem i le senituri e fa, atoa ma sauniga na tapenaina ai le fanau iti mo sakalameta pa'ia, i le vaitau sa fa'aigoaina o le 'Taimi o le Fa'apupulain-a' (Illumination), po'o le 'Taimi o le Mala-malama' (Enlightenment).

Sa 'ese'ese faiga e faitauina ai aso o le fa'alāina e atunuu o Sasa'e fa'apea ma atunuu o Sisifo. Mo Sasa'e, e māi'oi'o lelei lava aso fa'ailogaina o le Eukalisitia ma aso o le fa'alāina. O Aso Toonai ma Aso Sa, o aso fa'apitoa ia mo sauniga o le Eukalisitia, ma o lona uiga e na o le lima aso fa'alāina e tatau ona i ai i le vaiaso. Ae peitai, i atunuu o Sisifo, e mafai ona fa'amamaluina le Eukalisitia i aso o le fa'alāina, ma o lona uiga o le Aso Toonai e mafai ona aofia i totonu o aso e fa'alāina ai. O le tasi tulaga e tatau ona silafia, sa 'ese'ese le atina'eina o tusi ma faitauga mo sauniga fa'a-Roma ma le Pisanitina.

O le Ekalesia i Roma, e foliga mai na amata lona fa'amamaluina o le Fāgafulu, i le fa'atauina o le fa'alāina i totonu o le ono vaiaso ao lumanai ai le Eseta, ae sa lei mamafa i le faitauina o le fāsefulu aso. Peitai, sa fa'asolo mai pea ma o'o ai ina fa'apena foi ona fa'atauina e latou le faitauina o le fāsefulu aso mo le fa'alāina. Talu ai o le ono vaiaso lea e fa'alāina ai mo aso e ono, e maua ai le aofai e tolusefulu ma le ono aso, na toe fa'aopoopo i ai isi aso e fa, lea ua aofia ai ma le Aso Lulu o le Lefulefu, o le ulua'i aso lea o le Fāgafulu.(E faigofie ona tatou iloa e lē o le agaga lea mai le amataga o le Tatalo mo Meaalofa (Taulaga) i le Aso Sa muamua o le Fāgafulu, lea o loo aga'i i le amataga o le Fāgafulu i le fa'asologa o le

O LE FĀGAFULU MA ONA SAUNIGA

Misasa fa'a-Roma. O lea tatalo o lo'o fa'aaau mai lava i onapo nei i le fa'asologa o le Misasa).

E lua nisi vaega o le tala fa'asolopito e fia faia i ai se manatu, a'o lei o'o atu i le mataupu o le Fagafulu ma lona fa'amamaluina i totonu o le Ekalesia Katoliko i aso nei. Sa taufai fa'aopoopo e ekalesia i le itulagi i Sasa'e fa'apea ma Sisifo o le kelope, ia ni vaitaimi e sauniuni ai e auala i le fa'alaina, a'o aga atu i lenei vaitausaga taua. O atunuu i Sasa'e, e matua mamalu lava ma fa'amalosia le fa'alaina mai a'ano o manufasi ma mea'ai gaosi mai manufasi, i aso o le fa'alaina. O le Aso lona lua, ao lei amataina le Fagafulu (o le Aso Gafua e amata ai le Fagafulu i atunuu i Sasae), e ta'ua o le Aso Sa tatala mo a'ano o manufasi, o le Aso Sa mulimuli lea e fa'ataga ai le taumafalia o a'ano o manufasi. A'o le aso a'o lumanai ai le amatalia o le Fagafulu, e ta'ua o le Aso Sa tatala mo le sisi, o lona uiga o so'o se taumafa e gaosia mai manufasi e fa'ataga ona taumafalia ai.

I atunu'u i Sisifo, sa i ai le vaitaimi e tolu vaiaso na amata mai le senituri e ono, sa fa'ailogaina o le vaitau o le Fagafulu, i le vaitaimi tonu sa feagai ai Roma ma osofaiga a tagata mai fafo atoa ma se oge tele. O Aso Sa ia e tolu, sa talafeagai ma le aofaiga e lima sefulu aso o le Limagafulu (Quinquagesima), ono sefulu aso o le Onogafulu (Sexagesima) ma le fitu sefulu aso o le Fitugafulu (Septuagesima), a'o lei o'o i le Eseta. O la'ei ma 'ie paia lanu violē ua suitulaga ai 'ie paia ma la'ei lanumeamata i le tuana'i ai o le Epifania mo sauniga o le Aso Sa o le Fitugafulu.

O lona lua, o le Fagafulu a Roma, sa aofia ai se fa'asologa o sauniga e ta'ita'ia e le Tupusa i falesa 'ese'ese i aso ta'itasi. Sa ta'ua ia falesa, o sētāsio lea na fa'apogai mai ai le fa'aupuga o 'sauniga fa'asētāsio'. E faigata ona maitauina se fa'asologa tumau o le filifilia o ia falesa, ae lua mea sa manino mai ai: o le agaga autū, o le saunia lea ma le tāpenaina o fanauiti (katekūmeni) mo le sakalameta o le papatisioga, ma fa'apea ai ona avea le Aso Sa muamua e fa'atino ai le sauniga o le papatisioga i le falesa o le a'ai, i le Malumalu o Sagato Ioane Luterano. O le sētāsio mo le Aso Lulu o lona fa o vaiaso o le Fagafulu, sa fa'atinoina lea i le malumalu o Sagato Paulo-i-Tua-o le-Pa-Puipui. O lea aso e foliga mai atonu pe o le amataga lea o le fa'aiuga o le vaitaimi o le katekūmeni (le tolu vaiaso o le Fagafulu fa'a-Roma?), ma o le Talalelei o lea aso sa si'itia mai lea i faitauga fa'apitoa e saunia ai tagata o le a papatisoina, mai le loane e 9; o le tala i le Tagata Tauaso i lona fanau mai.

O nofoaga e fa'atino ai sauniga o le Fagafulu, e fesuisuia'i ona filifilia mai totonu o itumalo fa'a-ekalesia e fitu i totonu o le a'ai. E masani foi ona fa'aogaina faitauga o aso taitasi ina ia fetai ma tapuaiga ma nofoaga o lo'o faia ai le sauniga. O se fa'ataitaiga, o le Aso Gafua muamua o le Fagafulu sa faia le sauniga i le malumalu o Sagato Petelo-Noanoatia-i-Filifili. O le faitauga muamua sa si'itia mai le Esekueli 34, e uiga i le Atua o le leoleo mamoe (faifeau). O Petelo, e pei ona silafia, o le faifeau iloga ma le tautaua o le ekalesia Katoliko Roma. E fa'apena foi i le Evagelia mai le Mataio 25 atoa ai ma le Tatalo.

O le Fagafulu la, e pei ona tatou fa'amamaluina i lenei

vaitaimi i totonu o le Ekalesia Katoliko, e mautinoa lava o lona amataga na afua mai tu ma aga a Roma anamua. O se vaega sili ona taua o le mafai lea ona fa'auuina o le filifilia o faitauga mo aso ta'itasi. O le vaitausaga lenei, e filifilia ai faitauga muamua o aso ta'itasi mai le Feagaiga Tuai lea sa lē masani ona fa'aogaina i sauniga mo isi aso o le tausaga i le fa'asologa o tapuaiga fa'a-Roma anamua. O sauniga fa'a-setasio na mou atu ma lē toe fa'aogaina i le senituri e sefulumaletolu, ae peitai, na toe lalaga mai ma fa'aolaolaina i totonu o le Ekalesia e Pope Ioane XXIII. O le sauniga lenei, e auai le Tupusa i tausaga uma. O le mea sa masani ai, o le polosesio savavali po'o le fa'aogaina o solofanua agai i le malumalu, o le Sagata Ana Sapina o le Avenitina (Santa Sabina on the Aventine), sa amata mai i le malumalu o le Sagata Anasetasia (Santa Anastasia). Ae o aso nei, o lea ua amata le polosesio i le malumalu o Sagato Anesemo, e le mamao 'ese lava mai le mea sa masani ai i aso ua tuana'i.

O le malosi'aga o le fa'avae o tapuaiga a le Vatikano II, i le toe fafaguina mai lea o vaega e lua e fa'atauina i le vaitaimi o le Fagafulu, e iloa gofie i le suiga o tapuaiga i sauniga o Aso Sa. O le faiga ma le fa'asologa tuai fa'a-Roma sa i ai faitauga o tusi mo tapuaiga, o le Talalelei po le Evagelia mo Aso Sa muamua e lua, o le Fa'aosoosoina o Iesu i le vao ma le Afio A'e o le Ali'i i le Lagi. Peitai la, o le taimi nei, ua fesuisuia'i Evagelia nei, e fua i le fa'asologa e tolu tausaga o faitauga filifilia mai Evagelia Autū mo lea tausaga ma lea tausaga. Ae o suiga tetele lava, e maua lea i le Aso Sa tolu, Fa ma le Lima i le Fa'asologa o le Tausaga A o le Lisi o Faitauga. E fa'avae la suesuega o le tala fa'asolopito o sauniga ma tapuaiga faa-Roma, ua manatu ai nisi o le au atamamai, pe le ua tataua ona toe fa'amamalu i sauniga o Aso Sa ia le tuli'esea o temoni. O evagelia ia e tapena ai ma sauniuni mo le fa'amanatuina o le Vaiaso Sa Sili. Afai e iai nisi e fia papatisoina i le taimi o le Eseta, ona fa'aoga lea o faitauga mo le Aso Sa o le tausaga A e sui a'i faitauga o isi tausaga. O Evagelia ia o le loane 4 (O le Fafine Samaria), loane 9 (O le tagata na fanau mai o tauaso), ma le loane 11 (O le toe fa'atuina mai o Lasalo). E talafeagai ia faitauga uma ma vaega tetele e tolu o le fa'apaiaina: o le vai o le ola, fa'apupulaina ma le ola. Ole laugaina ma le tataloina o nei faitauga fa'atasi ai ma uiga ma taga fa'atino o ia sauniga, e mafai ona avea ma fa'asiliga malosi mo tatou uma ua saunia e fa'afou tautinoga o tatou papatisioga i le alalafaga o le Pasikate po'o le Aso Sa o le Eseta. O se tasi faiga e mafai ona silasila ma manatu i ai, o le avea lea o le Fagafulu ma taimi o le maopoopoga ma latou ua sauni mo lo latou fa'apaiaina i totonu o le ekalesia i le taimi o le Eseta. Aemaise ai pe a o'o ina fa'auma sauniga o le fa'apaiaina o latou ia, a'o le'i o'o i le taimi e fa'ailoa ai le fa'atuatua i le taimi o le misasa, o tatou uma o lo'o totoe, e tatou te mafaufau loloto ai ma toe fa'amanatu mai mo i tatou le taua o lo tatou papatisioga.

E i ai isi faitauga o le Evagelia i Aso Sa o le vaitausaga o le Fagafulu, mo se fa'ata'ita'iga, o le tala i le Atalii Fa'amaumau'oa (Luk. 15), i le Aso Sa Fa (Tausaga C), le tala i le Fafine na maua o mulilua (Ioa.8.1-11), i le Aso Sa Lima (Tausaga C), ma le Fa'amāmāina o le Malumalu (Ioa.2), i le Aso Sa Tolu (Tausaga C).

O le kalena o lo'o i ai nei fa'a-Roma, o lo'o fa'atulaga mai ai o

O LE FĀGAFULU MA ONA SAUNIGA

le Fāgafulu e amata ona fa'amamalu atu i le Aso Lulu o le Lefulefu seia o' lava i le taimi o le amata ai le Misasa o le Paseka a le Alii i le po o le Aso Tofi Pa'ia. E matua manino ai i lea tulaga, le mai'oi'o lelei o le va o le vaitausaga o le Fāgafulu ma le Vaiasosa Sili, lea e fa'atoa fa'auma i sauniga ma vi'iga i le Aso Sa o le Eseta. O le fa'asologa o misasa Roma i aso anamua, o le Aso Sa Lima o le Fagafulu, sa ta'ua o le Aso Sa o le Pasio lea e amata ai le vaitaimi e lua vaiaso soso'o, e ufiufi ai le koluse ma fa'atusa uma i totonu o le malumalu. O le tusi aloaia mai le Vatikano e pulea ma fa'atonuina ai le tapenaina ma le fa'atinoina o sauniga o le Eseta (1988), o lo'o fa'ataga ma tatala mai ai le fa'aauuina pea o ia tulaga. O le Aso Faraile Paia (Aso Maliu), e ave'esea ai le ufiufi mai koluse i totonu o le malumalu, i le taimi o le sauniga o le Maliu o le Alii, ae o ufiufi o fa'atusa e tumau pea seia fa'atoa ave'esea i le taimi o le alalafaga mo le Eseta.

O le Fa'asologa Aloaia ua i ai nei o sauniga ma ona faitauga ma tatalo, ua toe amanaia ai se tasi o tu ma aga fa'asakalamera a Roma, ua ave ai i le Aso Sa Ono o le Fagafulu le fa'alaina, o le 'Aso Sa o le Pasio'. O lona tolu o lomiga o le Fa'asologa Aloaia o tapuaiga ma sauniga lotu, e pei ona i ai i le taimi nei, ua fa'aigoa ai nei o le 'Aso Sa o le Palema ma le Pasio o le Alii'. O le sauniga lenei, e masani ona faigata lona laugaina, talu ai ona e amata i le ulufale manumalo ma le fiafia o le Alii i le a'ai o Ierusalem, e pei ona molimauina i le polosesio o palema, e pei ua lagomia ai le 'alagina o le Pasio. E le mafai foi ona umi se lauga e faia, ona o le umi o lenei sauniga. E fa'anoanoa ia tulaga, auā o le Aso Sa o le Pasio ma le Palema, e na'o le pau lea o le taimi o le tausaga fa'alelotu e mafai ona tatou fa'alogologo lelei ai i le faitauina atoa o le tala i puapuaga ma le maliu o le Alii (o le isi taimi o le Pasio mai le Evagelia a Ioane i le Aso Faraile Paia po'o le Aso Maliu).

O latou o lo'o sa'ilili i se ki e tusa o le uiga fa'a-telosia ma le fa'a-le-agaga o le Fagafulu, e le tatau ona mamao 'ese lo latou taumafai, nai lo le fa'atomuaga ma fa'amatalaga e tusa o lenei vaitau taua. O le fa'atomuaga muamua lava i le

Fa'asologa Aloaia o Sauiga, o lona ulutala o le 'O le Uiga fa'a-le-Agaga o le Fagafulu'. O le agaga ma lona fa'amoemoe autu, ina ia fa'aaogaina i Aso Sa, e leai ni o latou fa'amatalaga tomua; o se fa'ataitai'iga o le Aso Sa Tolu, Fa, ma le Aso Sa Lima i le Tausaga B fa'apea ai ma le Tausaga C. O le fa'atomuaga lenei, o lo'o talanoa mai i lo tatou fa'atalitali i le Eseta 'ile fiafia o le mafaufau ua fa'amamaina atoatoa, ma ta'ua ai nisi o tu ma aga taua o le vaitaimi o le Fagafulu, o le tatalo lea ma le faia o galuega alofa mo isi'. O lona lua o fa'amatalaga, e matua talafeagai lelei lava foi mo Aso Sa e pei ona taua i luga. O le autu o lea fa'atomuaga e faitauina fa'apea; 'Ua e tu'uina atu i lau fanau se taimi paia ma le taua mo le fa'afouina ma le fa'amamaina o latou loto, ma fa'asa'olotoina uiga ma lagona le fetai, ma latou mafai ai ona taofi mau i mea atali ae le o mea e mavae o lenei olaga'. O ia mea, o ni fa'ataitai'iga sili ia o le manatu autu, 'o mea e talosia e le Ekalesia, e talitonu ma le fa'amaoni i ai'

E masani ona tatou talanoa i le Fagafulu, o se malaga o lo'o alu, ma ua manatu ai, atonu e fetai pe a fa'auma atu se lagona i fa'aupuga lenei mai tusitusiga a se tasi o faiaoga Telosia o le Ekalesia Orthodox, o Alexander Schmemmann, mai lana tusi, ua fa'aigoaina o le 'Ole Fagafulu Tele: o le Malaga i le Vaiasosa Sili' (Great Lent: Journey to Pascha, 1974).

"O se malaga, o se malagasa. Ae a amata, a tatou amataina, e tatou te faia le la'asaga muamua agai atu i le "fa'anoanoa pupula" o le Fagafulu, tatou te iloa – mamao, mamao atu lava – le taunu'uga. O le fiafia o le Eseta, o le faitotoa ulufale lea i le mamalu o le Nu'u Paia. Ma o le va'aiga lenei, o se fa'ata'imuaga lea o le Eseta, e pupula ai le fa'anoanoa o le Fagafulu ma liua ai ma 'vaipuna fa'a-le-agaga' a tatou galuega i le taimi o le Fagafulu. E moni e pouliuli ma umi le po, ae e sulugia le ala i le malamalama pupula o le taeao fou. "Aua e te tu'ulafoa'ina o matou fa'anaunau, oe e ou le Alofa Tu-noa"

(Fa'aauu ile isi lomiga e soso'o ai).

I SAKALAMETA UA TATOU FEILOA'I ATU AI IĀ IESU

Na folafola mai e Iesu e le'i sau e ave'ese le Tulafono, ae ia fa'ataunu'uina. I le Sulufaga o le moliga, ua ia fa'ailoa mai ai e le'i sau e ave'ese le sauniga, ae ia fa'ataunu'uina.

O Maria ma Iosefo, sa mulimuli i le Tulafono, aumai le pepe o Iesu i Ierusalem e fa'apa'ia iā te ia i le Ali'i ma momoli le taulaga. O sauniga uma lava o se gaioiga, i se isi auala, e sa'ili ai fa'amanuiaga a le Ali'i. Ona e leai se isi fa'amanuiaga e sili atu i lo le afio ai o le Atua na Liutino tagata, ua tatou maua ai le tatalo ua fa'ataunu'uina ai le sauniga, lona uiga, o lo'o afio ai o le Ali'i o lo'o talosia.

I le Atevetu, ua tatou fa'alogologo ai i le tagi a le Perofeta o Isaia o fa'amatala le tagi i loto o tagata uma lava: E! ia e sasae le lagi ma ia e afio ifo (Isaia 64: 1). I le Molimoliga, ua tatiu fa'alogologo ai i le perofeta o Ana o fa'afetai atu i le Atua mo le tali i le tagi e ala atu i lona Alo. Ma na ia alu atu ma tautala atu e uiga i le tamaititi iā i latou uma o lo'o fa'atalitali mo le fa'aolataga.

Ona o tatou o Katoliko, ia tatou si'i le fa'afetai mo mealofa o sakalameta. 'Aua ne'i o tatou fa'atalalē i sauniga ua tatou patipatia o lo'o i ai nei ma ua fa'ataunu'uina e le afioa ai o Keriso. Ia tatala o tatou loto ma fa'atalitali lona afio fa'aola, e pei o loto o Simeona ma Ana. I le tu'u fa'atasia ma i la'ua ma le Ekalesia aoao, ia tatou folafola ma le fa'afetai, auā ua iloa e o'u mata le fa'aolataga ma iā te 'oe ua e saunia (Luka 2:30).

SAGATO IELOME EMILIANI (1481 – 1537)



O se fitafita e le taupulea ma le lē fa'aeteete mai le 'a'ai o Venice, na pu'eina lelome i se misa sa tupu i se 'a'ai i tua atu o le taulaga ma saisai ma tu'u i se āna falepuipui. A o i ai i le falepuipui sa tele se taimi e

ga o mea na tutupu na toe vala'auina ai lelome mo se fa'ai'uga ma se ituai-ga o olaga fou. O fa'ama'i ma le oge na a'afia atoa ai Italia i matū. Na amata ona fa'asaga atu lelome mo le tausia o tagata mama'i ma fafaga latou sa fia 'a'ai ma o mea'ai na

mafaufau ai, fa'atau lava e ia. I lana 'au'aunaga i le ma sa 'au mama'i ma le 'au matitiva na fa'asolosolo amata ai loa ona ia tu'u atu se ai ona iloa taumauga o ia lava ma ana 'oa mo ona tatalo. latou ia, aemaise tamaiti ua leai ni lna ua sola aiga. Sa ia fa'avaeina ni nofoaga mo 'ese mai le tamaiti e leai ni matua ma ni aiga se falepuipui, tolu, o ni nofoaga mo tamaita'i o sa toe fo'i lo'o nonofo i le 'auala fa'apea se atu i Venice falema'i.

ma na ia I le vaitausaga 1532 na fa'avae ai e ta'ita'ia ai le lelome ma ni faife'au e to'alua se a'oa'oina o fa'apotopotoga e fa'apitoa mo le ona tei – ma fa'ausaga ma va'ai tamaiti e leai ni a'oa'oga mo matua ma ni aiga fa'apea le a'oa'oina le tofiga osi- o tupulaga. Na maliu lelome i le tau- taulaga. saga 1532 mai se fa'ama'i sa ia pisia

I tausaga ina ai a o tausaga 1928 na fa'aigoa ai e Pope Pio ua mae'a lona fa'au'u- XI o ia o le sulufaga mo tamaiti e leai ni matua ma ni aiga.

O LE MOLIGA O LESU I LE MALUMALU

O le Sulufaga o le Moliga O Le Ali'i (masani ona iloaia o le Candlemas) i le aso 2 Fepuari ua fa'aailoga ai le fasefulu o aso talu le fanau mai o Keriso i le Kilisimasi. E pei ona ta'ua e le Tulafono a Levitiko (Lv. 12: 6 – 7), o le aso lenei e mana'omia uma ai e fafine lutaia ona momoli atu i latou lava i le malumalu: tu'ua le avanoa o le fanau mai o pepe ina ia toe tu'ufa'atasia ma fa'apotopotoga. I le tulaga o le tane ulumatua, o ona matua e faia se taulaga (fuafua i le mafai), o le a toe "fa'asaoia" mai ai o ia mai le vala'auina tu'u sa'o e avea ma ositaulaga. O lea vala'auina ua suia mai ia fuafuaga ua fa'ata'atia i le fuafuaga o le sa'olotoga.

Mai le 1997 aga'i i luma, Candlemas o lenei sulufaga ua fa'apitoa mo talosaga mo olaga o le au faitofi. O

Sagato Ioane Paulo II na fa'avaeina lenei asosi, ma fai mai o lenei sulufaga o se "fa'aailoga tāua o le foa'i atu atoa o le ola o se tasi, latou ua vala'auina e toe foafoaina i totonu o le Ekalesia ma le lalolagi...o fa'aailoga va'aia ia a lesu Keriso"

O ali'i ma tama'itai fa'apa'iaina ua tu'uina atu o latou lima i luma o le Tamā ma talosaga atu ina ia fa'aogā i latou mo lona mamalu tele. Ua atagia mai ai iā latou fuafuaga e tupu i le Eukalisitia, pe'ā fausia se mea e le tagata – falaoa ma le uaina – avea ma olaga mamana. I lona fa'auigaina, o se tagata ua fa'apa'iaina ua sili atu i lo numera o vaega o lona lava tino. O le asō i lo se isi lava taimi, ua tatou mana'omia ai ni tagata e faia lenei fa'aailoga pa'ia: mo le 'au fa'apa'iaina ina ia maua se taimi e faia ai ni

avanoa saogalemū e mafai e le to'atele ona mapu atu i ai i taimi o le mana'oga. E pei ona fai mai Pope Penetito: "Ona o le tulaga ua fa'apa'iaina ua avea ai le tagata ua fa'apa'ia, e pei ona i ai, o se 'auala laupapa' i le Atua mo latou uma ua feiloa'i atu iā te ia."

Fai mai se tasi o Tama'ita'isa, Catherine Wybourne, O.S.B., "A tatou va'ai i le olaga o lesu, o upu uma, o ana gaiogiga uma ua Tautala mai i lona fa'anaunauga e lave'ai, fa'aleleia, ma faia ia atoatoa. O le mea lenā e ao iā i latou e lē talitonu ona va'aia iā i tatou."

TALA O LE FA'AOLATAGA

Mai le va'aiga a le Atua, o le tala'aga o le tagata po'o le *Tala o le Fa'aolataga*, e mafai ona vaevaeina i le taimi i luma atu o Keriso – taimi o le sauniuniga, ma le taimi i tua mai o Keriso – taimi o le fa'ataunu'uina.

O le Atua le Tamā, o ana fuafuaga e fa'amaopopo mai le lalolagi atoa ia Keriso, lona Alo, i le malosi o le Agaga, le Agaga Pa'ia. I feagaiga tuai, o le agaga o le Atua sa galue mamao mai mo tagata i le fa'avaeina o feagaiga – ma e ono le aofa'i. I le feagaiga fou, ua fa'avaeina e le Atua se feagaiga āoāo po'o se feagaiga Katoliko ma Lona Alo Liutino Tagata, o Iesu.

O le Tala Ia o le Fa'aolataga o se vaega o le mataupu silisili na amata ona tu'u fa'atasia i le seneturi 19 e fa'amatala ai le a'oa'oga Tusi Pa'ia ole Atua na galue ile tala'aga o le nu'u fa'afeagaiga e

'aumai le fa'aolataga i le lalolagi atoa. O mea tāua na tutupu o lo'o fa'amatala mai e le Feagaiga Tuai e 'a'afia ai feagaiga e ono ma Isaraelu, fa'apea ai le fausiana ole tapenakulo ma mulimuli mai ai le malumalu e fa'amatala ai le fa'amagaloina fa'asakalameta e le Atua o agasala a ona tagata.

I le Feagaiga Fou ua fa'ailoa mai ai lea tala'aga o se Feagaiga Fou i le tagata o Iesu, i lona olaga, i lona maliu ma lona toetū ua fa'apupula lelei mai ai le galuega alofa a le Atua o le fa'aolataga. I tusitusiga pa'ia, o le nu'u fa'atuatua ua fa'aali lo latou fa'atuatua i le fa'amatanuina o nei feagaiga tetele, tautōga, sakalameta ma amioga fa'a – Atua (cf. Teuterenome 26: 5- 9; Salamo 105; Galuega 10; 36 – 43).

Taimi o le Tapenaga/sauniuniga: Ina ua pa'ū Atamu ma Eva i le agasala, na

faia e le Atua se tautōga po'o se folafolaga. O le mea ofoofogia sa faia ma Satani -

“Ou te fa'atupuina le feitaga'i iā te oulua ma le fafine, lau fanau fo'i ma lana fanau; na te tu'imomomoina lou ulu, a o oe e te tu'imomomoina lona mulivae.” (Kenese 3:15)

O le Atamu Fou ma le Eva Fou: O fuafuaga a le Atua o le auina mai se Atamu fou (Iesu) ma se Eva fou (Maria) ina ia fa'avae se tagata fou, ma se aiga fou o le tagata ua fa'afouina ma fa'amalosia e lona Agaga.

Tapenaga e auala atu i Folafolaga (Tautōga) ma Feagaiga Ina ia fa'ataunu'uina lenei fuafuaga, sa tapenaina e le Atua se nu'u mo ia lava. O 'auala sa fa'aogā o *folafolaga ma feagaiga*.

FEAGAIGA MUAMUA MA ATAMU

Na faia e le Atua se feagaiga ma Atamu, o le feagaiga o le fa'aipoipoiga, iā Atamu ma Eva, na folafola e le Atua e avea o ia mo lā Atua pe afai e avea i la'ua ma ona tagata. Na ia ave i ai se tofotofoga o le usita'i ma na la'ua sesē ai ma mafua ai le ulua'i agasala. Ae ui i lea na faia e le Atua se folafolaga. Na fa'asalaina Atamu ma Eva, ae na galue pea le Atua ma i la'ua.

O le fa'ailoga o le Feagaiga muamua lenei (Feagaiga Fa'aatamu), o le Sapati. Mo Atamu ma Eva o le aso muamua o le vaiaso o le aso malolō – malolō i le Atua. I le gagana Eperu o le upu mo le “tautōga” (sheba) o le upu mo le numera 7. O le fa'atautōga i se folafolaga o le *“fa'afitu lea o se tagata lava ia”* O le Sapati ia ua malamalamaina o le aso e *manatuaina* ai e Isaraelu le feagaiga a le Atua i le foafoaga.

10

FEAGAIGA LONA LUA MA NOA – 2500BC

O mea na tutupu ina ua mae'a le pa'ū o le ulua'i tagata na fa'asolo ina leaga, ona faia lea e le Atua o le feagaiga lona lua ma Noa. E ui lava na finagalo le Atua e fa'asaoina tagata uma, ae na' o Noa ma lona 'auaiga na fa'asaoina i le va'a. O le fa'ailoga o lenei feagaiga o le “nuanua” i le lagi. O le va'a o le a avea ma foliga va'aia o le Ekalesia, o le va'a a Peteru.

FEAGAIGA LONA TOLU, APERA'AMO – 2000BC

O le feagaiga lona tolu na faia e le Atua ma Apera'amo. O le feagaiga o *ITUA'IGA* ma o le fa'ailoga o le Peritomeina. Na poloa'i le Atua ia Apera'amo, “Ia tu'ua e oe o lou nu'u ae alu atu i se nu'u ou te fa'asino atu iā te 'oe” (Kenese 12: 1). Na folafola e le Atua e fa'amanuia i nu'u uma e ala atu ia Apera'amo. O le fatu o le talitonuga Katoliko ua maua uma i feagaiga ia e tolu – ia Atamu na folafola e le Atua se feagaiga fa'aleaiga, ia Noa na folafola e le Atua le fa'aolataga e ala mai le va'a ma ia Apera'amo na ia folafola e fa'amanuia i nu'u uma.

O Fa'amanuia e Tolu a le Atua mo Apera'amo

Kenese 12: 2 – 3

Folafolaga	Avea ma Nu'u	“Igoa” (‘Au Aiga)	Lalolagi Atoa Fa'amanuia
Feagaiga	Kenese 15	Kenese 17	Kenese 22
Fa'ataunu'uina	Feagaiga ma Mose	Feagaiga ma Tavita	Feagaiga Fou

Le 'Au Pateriaka – Apera'amo, Isaraelu ma Iakopo

Na i'u na maua se tama fa'alefa'atuatua a Apera'amo ma Sarai, o Isa'ako. O Isa'ako sa iai lana masaga o Esau ma Iakopo. Sa finafinau Iakopo ma le agelu a le Atua ma na toe fa'aigoaina ai o Isaraelu. O Isaraelu e 12 lana fanau tama, o le to'atasi na igoa ia Iosefa, o lē na fa'atauina atu i Aikupito. I le 7 o tausaga o le oge, na malaga atu ai Isaraelu ma isi ona atali'i ma fa'atasi atu ai ma Iosefa i Aikupito, ona o Iosefa ua avea ma palemia a le Farao ma na maua ai mea e 'ai mo latou.

TALA O LE FA'AOLATAGA

FEAGAIGA LONA FA MA MOSE – 1500BC

O le feagaiga lona fa na faia ma Mosa, se tasi o suli a Aperá'amo na fanau i Aikupito le nofoaga na nonofo ai ituaiga e 12 o Isaraelu (fanau a le atali'i a Aperá'amo) mo le 400 tausaga. Na filifilia Mose e ta'ita'ia le nu'u filifilia, o Isaraelu, mai Aikupito sa nofo pologa ai. Ina ua mae'a ni folafolaga ma ni mala, na fa'asa'olotoina e le Farao tagata Isaraelu ina ia mafai ona malaga atu i le nu'u na folafolaina e le Atua i ai. Ae le'i tu'u Aukupito sa tu'uina atu i ai e le Atua fa'atonuga e uiga i le Paseka o le Mamoe ma le Meaa'i o le Paseka, e fa'amanatu ai le ui mai i le nu'u na folafolaina. O le Paseka la na avea ma fa'aailoga o le Feagaia ma Mose o lea ua 'a'afia ai le nu'u atoa o Isaraelu.

O Mose sa tu'u fa'atasia Feagaiga o le Teterenome ma ni tu'utu'uga i mea tau i le tele o avā, fa'aipoipoga mālepelepe, toe fa'aipoipoina, fa'apologaina, nonoagā tupe lē talafeagai ma le faia o ni fale mo le fa'amoemoe e nonofo ai ni tama'ita'i e evea ma avā. Sa ia fa'aofi mai nisi o tulafono fou se lua: O le tulafono o tupu ma ogātonu o le satualio – o le tapenakulo, o ni vaega autū fa'asakalameta ia na fa'ataunu'uina e Iesu. O le fuafuaga a le Atua o le fausia lea o se malumalu fa'alalo nei, o Lana Tapenakulo, o se nofoaga e mau afio ai i lenei lalolagi. O le avea lea ma ana Ekalesia e Tasi, ma Pa'ia. Sa tu'u atu fo'i e Mose ni lapata'iga e tolu i nofoaga tupu o le lumana'i: 'aua ne'i fa'aputua ni 'aupega, avā po'o ni 'oa. Sa fa'apea Saulo, fa'apea fo'i Tavita ae o Solomona na talepe uma ia tulafono. Mai fa'aipoipoga, aga'i atu i auaiga, i ituaiga i se nu'u – na fa'apea ona tuputupu tagata a le Atua.

Taimi o Fa'amasino

I le vaitau o Fa'amasino, 1500BC aga'i atu 1000BC, sa tete'e atu le nu'u o Isaraelu, ona fa'ato'ilaloina lea, ona alaga atu lea i le Atua, ona fa'asaolotoina ai lea, ae na toe lē fa'amaoni, ma toe fa'ato'ilaloina fo'i ma toe fa'asa'olotoina. O lenei faiga sa tupu pea tupu pea. O se faiga fa'atalaiga o le fa'aolataga: agasala aga'i atu i le pologa, fa'amaualalo, fa'aolataga, i le anoano ona toe agasala fo'i lea.

Ina ua mae'a Fa'amasino mulimuli na'o ositulaga sa ta'ita'ia Isaraelu. Sa latou alaga atu i le Atua mo sa latou tupu. Sa fa'asalaina e le Atua i le faia o le mea na manana'o ai. Na fa'asolo ina ua uma atu le fa'asologa o Fa'amasino ona o le fa'asaga tau o tagata Isaraelu fa'apea le amio pi'opi'o o le 'au sa Levī (Fa'amasino 17 – 19). I le fa'atonuga a le Atua na fa'au'u ai e Samuēlu le Perofeta ia Saulo e avea ma fa'atamā/tupu o lenei aiga lē taupulea ma avatu ia Saulo se agaga o perofataga ma se loto fou. Na solia e Saulo le feagaiga ma le Atua ma na fa'asalaina e le Atua, e le'i ave 'eseina le tofi sa ia Saulo ae e le'i fa'atagaina lona atali'i e soso'o ma ia.

11

FEAGAIGA LONA LIMA MA TAVITA – 1000BC

Na faia e le Atua se feagaiga ma Tavita. O le fa'aailoga o lea feagaiga o le nofoātupu. Na auina atu e le Atua Samuēlu i Ierusalemā ia lese e aumai leui'i o ona atali'i e fa'au'u. O Tavita o se tagata e sa'ili mo le Atua ma e ali a'i mai i Salamo e 150 na ia tusia. Na matuā lelei Isaraelu i le pulega a Tavita.

Sa faia e Tavita Ierusalemā ma ana laumua, ona o i'inei sa fai lafoga ai Aperá'amo ia Metikaseko, le tupu – ositulaga o Salem. O ia lea na fa'apa'iaina Aperá'amo ma fafaga i ai i le falaoa ma le uaina (Kenese 14). O i'inei fo'i na ofo atu ai e Aperá'amo Isá'ako faapea le momoliina mai o le folafolaga a le Atua e fa'amanuia nu'u uma (Kenese 22). Sa fa'apea ai fo'i ona poloa'ia e Mose e fausia ai i se nofoaga tutotonu ina ua pu'eina le nu'u na folafolaina. O Tavita e le gata o se tupu ae o se ositulaga fo'i (cf 2 Samuēlu 6: 5). O Ierusalemā sa ia fa'atū ai lona fale 'ie ma 'aumai ai le ato la'au o le feagaiga. O Tavita na sau i Ieru – Salema la'e'i mai o se ositulaga – tupu, fa'amanuia i tagata ma avatu i ai falaoa ma uaina.

Taimi mo se Malumalu

Na mana'o Tavita e fausia se malumalu. Ae ona ua tele le toto masa'a i lima o Tavita, o lea na folafola ai e le Atua o lona atali'i o le a fa'avaeina se malō ma fausia le malumalu. O Solomona o ia lea na folafolaina e le Atua. I le amataga ua pei Solomona o Keriso, o le perenise o le filemū, le atali'i o Tavita, Tupu o Isaraelu, lē na fausia le malumalu, faia'oga o le atamai. Mulimuli ane ua lē amio tonu ona ua ia fa'aputu mea tau e pei o kariota, tele nauā avā (900 le aofa'i) ma ua tele le 'oa mai lafoga ua tasi'i a tagata. O lafoga sa ia tu'uina i ona lava tagata e 666, na avea ma fa'aailoga o le tevelo.

Lua Malō a e Tasi le Atua

O Reopoamo o le atali'i o Solomona, ua sili atu le tetelē o lafoga ua ia faia i tagata i lo lona tamā (cf 1Tupu 12: 10 – 11). Ua vevesi le taua ma ua vaevaeina ituaiga ma o ese ai le to'asefulu ae tumau ai na o le ituaiga o Peniamina i le fale o Tavita. O le *Malō i Matū* ua ta'u nei o Isaraelu, ma *le Malō i Saute* o lutaia e la'itiiti, na tupu ai Reopoamo. O le ola pu'upu'u fa'a'auro o le malo e tasi i lalo o Tavita o se ata fa'ata'ita'i lea fa'amalō a le Atua i lalolagi ua uma. O le mileniuma i luma atu o Keriso sa fa'amautu ai le fa'amamāina ma le toe fa'aleleia o le aiga o le Atua. Ina ua mae'a ni tete'e fa'apolokiki, o ituaiga e 10 sa tete'e atu i le fa'aleagaga. O le amio faita'aga ma le mulilua na mafua mai i le tupu o Jeroboam ...o lana nofoa'iga mai le 10 seneturi AD. O se tasi o mea fa'a'atū o lana nofoa'iga o le fausia lea o ni fa'atusa o ni tama'i povi 'auro e lua e fai i ai talosaga, e tasi i Bethel ma le isi i Dan. Sa ia tutuliseina uma le 'au sa Levī. Sa ia fa'aleaogāina le feagaiga na faia e le Atua ma Mose.

TALA O LE FA'AOLATAGA

Perofeta ma To'ilalo

O le tali atu a le Atua o le 'auina atu lea o perofeta e lapata'i le Malō i Matū – perofeta tetele e pei o Elia, Elisara, Hosea ma Aмосa. I le 722 i luma atu o Keriso, na osofa'ia ma fa'ato'ilalo ai e Asiria le ituaiga i Matū, o se nu'u leaga tele ma le fa'atupu fa'alavelave. Sa toe faia e Esekia ma losia ni fa'afouga na mana'omia tele. O Manase, le atali'i a Esekia, e lē gata sa tete'e atu i feagaiaga a le Atua, ae sa ia fa'atupu atili le leaga i Ierusalem sa le'i va'aia muamua, na o'o lava i le faitaulaga i atua fa'apaupau i ana fanau i luga o aletale afi i fafo atu o Ierusalem. Ua tupu le mala iā Ierusalem ona ua folafola le Atua e fa'asala Ierusalem.

I le seneturi mulimuli mai ai, e le'i lava taumafaiga a le tupu lelei o losia e fa'aleleia ai mea na faia e Manase. I le 600 luma atu o Keriso na pulea ai e Papeleonia ma i le 586 luma atu o Keriso, o la latou tupu o Nepokanesa na susunuina ma fa'aleagaina Ierusalem ma aveina 'ese atu tagata lutaia mo le 70 tausaga. Na fa'aleagaina le malumalu, le 'au ositaulaga na fasiotia ma faigātaulaga ua fa'asā ona toe faia. O le aiga o le feagaiaga a le Atua ua foliga mai ua fa'aumatia. Ae ui i lea o perofeta e pei o Isaia, Ieremia ma Esekielu ua latou va'ai i le fa'aaunu'ua i Papeleonia o se taimi tofia e le Atua mo fa'afouga ma le togisalaina ua fa'ato'ilaloina e le tupu o Sililo Papeleonia, sa ia tu'uina atu tagata lutaia e toe fo'i atu i Ierusalem ma toe fausia le malumalu (va'ai Isaia 44 – 45).

O LE FEAGAIGA LONA ONO – O LE FEAGAIGA FA'AOSITaulAGA MA ESERA 500BC

Ina ua toe fausia le malumalu na nofo mai ai Esera le ositaulaga sili. Sa ia toe fa'afouina le feagaiga, fa'amalosia tamaloloa lutaia e tete'a ma a latou avā mai nu'u 'ese, toe tusitusia le tulafono ma fa'auma le galuega o le malumalu. Ua leai ni tupu po'o ni perofeta ae o'o lava i le lainā tupu ua tumu i le vaivai ma le amio leaga. Ae ui i lea o le taimi fo'i lea o puapuagatia, sa lagona e tagata lutaia le loloto o le toe fo'i i le Ali'i. Ua fai tatalo, toe teuteu faiga o vi'iga ma ua avatu le fa'atuatua ma le fa'alagolago i tulafono a le Atua. Ma o le taimi muamua leni i le tala'aga a Isaraelu, ua fa'ae'eina tagata lutaia i le pale o le maletile (cf 1 & 2 Makapaio)

Fa'amatalaga a Sagato Iranaeus

Fai mai Sagato Iranaeus, se tasi o Tamā o le Ekalesia, "O le malamalama'aga ...fa'apea ai ma le fa'ailoa mai le mafua'aga ua i ai feagaiga ma le tagata ma a'oa'o le uiga tonu o nei feagaiga. "pe fa'apefea la o lou filigā i le fa'amasinoga o lau lava fanau, ua e tu'uina mai i o latou mātua o tautoga ma feagaiga fa'atasi ma folafolaga lelei." (Poto 12:21)

12

O LE FEAGAIGA LONA FITU – IA IESU 3BC – 33AD

O le taimi leni e fa'ataunu'uina ai e le Atua ana tautoga ma folafolaga. Sa fa'atino lea e ala i lona Alo o Iesu o lē na fa'avaeina le feagaiga fou i lona toto. O le feagaiga fa'ai'u leni ma o le feagaiga e Katoliko. O feagaiga uma lava na fa'ataunu'uina ia Iesu. Ona o le Atua e tasi, o leni feagaiga fou na fa'ataunu'uina e Iesu o le fa'avaeina lea o lana Ekalesia e tasi. Ona o le Atua e pa'ia, o leni ekalesia ua maua uma ai le mafai ma sakalameta e pa'ia ai tagata. Ona o le fa'anaunauga ma le alofa o le Atua mo tagata uma lava, o leni Ekalesia e Katoliko. Ona o le alofa o le Atua e salalau, o leni Ekalesia e Aposetoliko. O leni feagaiga fou o le a fa'ataunu'uina ai feagaiga tuai (cf Esekielu 16: 59; Hosea 1 – 3). O leni feagaiga fou e fa'avavau (cf. Hosea 2: 14 – 20; Isaia 54, Esekielu 16:60). Na folafolaina mai e le Atua e na te fa'amalumaluina (ia aveia ma ona nofoaga) ona tagata (Esekielu 37: 26 – 27).

O le Emanuel

O nei mea uma na faia e ala mai ia Keriso o lē sa mau fo'i ma i tatou, o ia o le Emanuel, *o le Atua ua i totonu o tatou* (Ioane 1:14) Mai ia te ia o tatou o tagata o feagaiga a le Atua. I feagaiga tuai, o le agaga o le Atua sa galue atu i folafolaga, sakalameta, feagaiga, perofeta ma ositaulaga. I le taimi nei o le feagaiga fou e amata i le Penetekoso, o le Agaga o le Atua ua ulufale ia i tatou ma suia ai i tatou ina ia tatou mafaufau, alofa ma amio e pei o Iesu. Ia Keriso, o tatou o se malo o ositaulaga ma se nu'u mamalu, o ni tagata na tofia e le Atua e aveia ma ona lava tagata ma se fa'aaliga e fa'amalamalama ai le lalolagi pogisā ma le māsofasofa. E ala mai iā Keriso, o le veli i luga o pa'ia o pa'iaga o le a tu'u atu, ma le fe'ese'esega o le feagaiga tuai o le a fa'aleagaina. O leni o le Ekalesia atoa o le nofoaga mau a le Atua. O ana fanau uma o le a maua se feiloa'iga ma le Atua Soifua. O ona tagata pa'ia o le a aveia ma sakalameta ola, o fa'aailoga va'aia ia o mea na faia e Keriso e momoli atu ai kalasia.

I le feagaiga tuai, o sakalameta, e pei o le tulaga molī auro, o afi mumū i le vao talatala, o le tapenakulo, faigataulaga i manu, ma nisi ole tele o faigatā ma le vaivai. I le feagaiga fou, e itiiti sakalameta a Keriso, faigofie, ma malolosi i 'auala 'ese'ese.

Upu Mulimuli

Ua tatou iloina nei le 'auala na tapena ai e le Atua ni tagata e mafai ona fa'atasi atu i ai. I feagaiga tuai, ua tatou iloa ai le fa'ataunu'uina o le Feagaiga fou sa folafolaina ma valo'ia. I le Feagaiga Fou, ua tatou iloa ai le fa'ataunu'uina o Feagaiga Tuai i se 'auala na va'aia ai o pateliaka, perofeta ma tupu i se fa'aliga o Iesu. Fa'apea fo'i o vaega ta'itasi uma o le tapenakulo o fa'aailoga o nisi o sakalameta Kerisiano.

I le tapenakulo sa i ai le faitoto'a sa fa'aigoina o le faitoto'a ole *ala*. E mulimuli mai se fetalaiga a Iesu, "O A'u o le ala," le 'auala lea e tasi i le iloina ole Atua. Sa i ai fo'i le aletale o se fa'aailoga o le fa'apa'iaiga.

TALA O LE FA’AOLATAGA

O LE Ì LA LE TALA O LE FAAOLATAGA (Salvation History)

E iai tumau le fuafuaga a le Atua mo le faaolataga o le lalolagi atoa.

O le Tala o le Faaolataga o le tala e faamatala mai ai pe faafelea ona faagalua lenei fuafuaga i le talafaasolopito.

E mafai ona tatou faitau i tala uma o le faaolataga o se tala faasolo o osiga feagaiga e fitu i le va o le Atua ma lona nuu.

Mai le amataga o le foafoaga, sa iai le fuafuaga a le Atua mo le faaolataga o i tatou mai iā tatou agasala. O le Tusi Paia o loo faamatala mai ai le tala’aga o lenei fuafuaga o le faaolataga. O le mea lea e ta’ua o le “tala’aga o le faaolataga”: o le tala i le fuafuaga a le Atua e faaola i tatou sa fausia mai le tele o tausaga. O le tala’aga o le faaolataga e ese mai isi ituaiga tala’aga; e le gata ina talanoa i mea sa tutupu, ae faapea foi ona talanoa i mea o le a tutupu. Auā o le Upu a le Atua sa faailoa mai ia i tatou, ua tatou iloa le fuafuaga o le faaolataga o le a galue pea seia o’o i le i’uga o le lalolagi.

O se isi itu e malamalama ai i le tala’aga o le faaolataga o le tilotilo lea e pei o se faasolosologa o feagaiga (series of covenants) i le va o le Atua ma i tatou. I le Feagaiga Tuai, o le feagaiga o se maliaga lea i le va o le Atua ma le tagata sa osia e ala i nisi o tagata ta’ito’atasi. O le feagaiga e pei o se konekarate, ae tele ma loloto atu nai lo le konekarate. O le feagaiga e faavaeina le sootaga o ni ituaiga: e tuufaatasia pe faamaopopoa se mafutaga faaleaiga. O le konekarate o se maliaga faavaitaimi, e faia e faatatau i le taualumaga o sea galuega i sea vaitaimi. O le feagaiga a le Atua e tuufaatasia ai tagata i se mafutaga e faia ina ia tumau. O se faalapotopotoga o se konekarate; o le faaiipoipoga o le feagaiga.

O le tala’aga o le faaolataga o le tala e uiga ia i tatou, tagata agasala, ua aumaia i totonu o le feagaiga faaleaiga o le Atua. E fitu feagaiga i le va o le Atua ma tagata i le tala’aga o le faaolataga. (O le numela fitu o le faailoga o le atoatoa o feagaiga i le Tusi Paia, o lona uiga e matua’i talafeagai lava.) O feagaiga ta’itasi uma e faia lea e ala i se ‘tagata e tu i le va’ ma e ui o feagaiga taitasi e atagia ai le folafolaga a le Atua mo tagata uma, o feagaiga taitasi e faaaogaina se ituaiga mafutaga faa le tagata soifua lautele.

1. O le ulua’i feagaiga ua tatou faitau ai i totonu o le Tusi Paia o le feagaiga ma Atamu. I le gagana Eperu, o le igoa “Atamu” e faaoga lea e faatatau i tagata uma. O lona uiga o le feagaiga lea e mapuna mai ai isi feagaiga uma.
2. O le feagaiga lona lua sa faia ma Noa ma lona auaga i le maea o le lolo.
3. O le feagaiga lona tolu sa faia ma Aperamo ma lona auaga.
4. O le feagaiga lona fa sa faia ma le nuu o Isaraelu e ala ia Mose.
5. O le feagaiga lona lima sa faia ma malo uma e ala ia Tavita ma Solomona.
6. O le feagaiga lona ono o le Feagaiga Fou ma tagata uma e ala ia Iesu Keriso.
7. O le feagaiga lona fitu, i le i’uga o le lalolagi, i le toetu a’e e faataunuu uma ai le Feagaiga Fou, pe a maea le malagasa a le nuu o le Atua i le lalolagi ma ulufale atu ai i le faavavau.

A tatou malamalama i le tala’aga o le faaolataga e pei ona ta’ua i luga, ona faigofie lea ona tatou malamalama i le Tusi Paia atoa. O le auga atoa lea o le Tusi Paia. E malamalama ai foi i le uiga o vaega eseese o le Tusi Paia ma lo latou aoga i le faamatalaga o le fuafuaga a le Atua mo lo tatou faaolataga.

Tala’aga o Feagaiga (Covenant History):

Va	Atamu	Noa	Aperamo	Mose	Tavita	Iesu
Tulaga	Tane	Tamā	Matai	Faamasino	Tupu	Ositaulaga sili
Foliga vaaia	Faaiipoipoga	Auaiga	Ituaiga	Malo	Malo tele	Ekalesia Katoliko
Faailoga	Sapati	Nuanua	Peritomega	Paseka	Nofoalii	Eukalisitia

MOLIGA O IESU I LE MALUMALU

O le aso o le fa'apa'iaga o le sela ma le polesesio ae le'i amataina le Misasa

ASO 2 FEPUARI ASO SA 4 TAUSAGA MASANI:

Faitauga 1: Malaki 3: 1 – 4

Matua: E fa'afuase'i ona o'o mai i lona malumalu o le Ali'i, o lē ua sa'ilia e outou.

Salamo: 24: 7 (tali), 8 (tali), 9 (tali), 10 (tali)

Tali: O ai ea lenā Tupu mamalu? O le Ali'i lava ia.

Faitauga 2: Eperu 2: 14 – 18

Matua: Ua tatau ona avea o ia, ia fa'apei o ona uso i mea uma lava.

Aleluia, Aleluia... O le malamalama e fa'amalamalama ai nu'u 'ese ma le malamalama o lou nu'u o Isaraelu ...*Aleluia.*

Evagelia: Luka 2: 22 – 40.

Matua: Ua iloa e ou mata lau fa'aolataga



Tofitofiga O le Upu:

Ona o le sulufaga o le Ali'i, o le Moliga i le Malumalu ua fa'amuumua ai i fa'asologa o Taimi Masani o le tausaga i le asō. Ua maua ai ma le avanoa mo le Sauniga e amata ai i le fa'apa'iaina o sela ma polesesio atu ai le 'au fa'atuatua i totonu o le falesa ma a latou sela o lo'o fa'amumuina. O le fa'ailoga fa'afulale o le malamalama o lo'o fa'ailoa mai ai le sau o Keriso o le malamalama i le lalolagi ma o le fa'ai'uga fo'i lea o le patipatia o le Liutinotagata i le Kilisimasi. O le Evagelia o le asō o lo'o maua ai le tele o fa'amatalaga a Luka: o le fa'amamafa mai o matua o Iesu e malosi lo la fa'atuatua ma na fa'ataunu'uina le Tulafono; le sini o le galuega a le Agaga Pa'ia ua o fa'atasi ma le i ai o Iesu. Na fa'ailoa mai e Luka Simeona ma Ana, ua pei o ni tagata o le Feagaiga Tuai, ina ia fa'ama'oti mai pea le fa'aauaina o le folafolaga iā Isaraelu i mea na faia iā Iesu. O le pese a

Simeona (*Nunc Dimittis*) o lo'o fa'amatala leleia mai. Ae o lo'o aumai fo'i e Luka se valo'aga malosi pe fa'apefea e le misiona a Iesu ona aumaia puapuagatia ma le fa'aolataga. O Maria o le puapuagatia, ma le 'to'atele' o le vala'uina e tali atu iā Iesu ona fa'apea ai lea pe toe fa'atuina mai pe pa'u'ū. O le fa'ailoga na te'ea ua tutusa ma le asō, ma o le Evagelia ua folafolaina ma fa'aalia Iesu o le Malamalama i le pogisā, o tagata uma ua vala'uina mo se tali – pe te'ea po'o le lē amana'iaina ole fa'ailoga o le filifiliga lea e tumau pea i le pogisā, o le maitauina o Iesu o le 'malamalama e fa'apupula ai 'Tagata o Nu'u'ese' o le filifiliga lea e tumau i le malamalama ma 'fa'asa'olotoina mai...le mata'u o le oti.' I le sauniga amata o le Misasa i le asō, ua fa'ailoa mai ai le fa'ai'uga a le 'au fa'atuatua e fa'atasi atu ma Simeona, Ana, Maria ma Iosefo e tumau pea i le malamalama.

Metitasio Aso Sa 2 Fepuari 2020

Olioli ma Fa'anoanoa fa'atasi ma Iesu ma Maria.

Na tali atu Maria i lana **loe** filemu ma lona olioli paia i le aso o le Fa'aaliga. Sa i ai foi fa'anoanoaga i totonu o lona loto i le mafaufau i mafatiaga na valoia e Isaia o le a o'o mai i lana tama. Ua sili atu le malamalama ua fa'apaleina mo ia i le misitelio o le Fa'aolataga ina ua tautala le toaina paia o Simeona e uiga i le pepe o Iesu o se fa'aolataga ua ia saunia e iloa e atunu'u uma, o se malamalama e fa'amalamalamaina ai tagata fa'apaupau. Na tumau le fa'afetai lēleo ma le lē mautonu o Maria...

Ona liliu ane lea o Simeona ia Maria, ma lauga atu ia te ia i upu fa'avaloga: O le pelu o le a taia ai foi lou lava agaga - ina ia mafai ai ona matala mafauauga lillilo o le toatele. A'o Maria o le a

i ai sona sao i tofotofoga o le Fa'aola. O ona puapuaga o le a avea ma ana. O lona lava fatu o le a tu'ia i se pelu o le fa'anoanoa

E i ai ni fete'ena'iga se lua o le atoatoaga o le alofa tunoa o Iesu: o le filemu silisili ona atoatoa o le agaga; ma le loto i le ofoina atu o ia lava o se tagata na te lavea'iina. O le alofa tunoa o Maria na i ai ni a'afiaga tutusa se lua: o le olioli mama i aso o le Fa'aaliga ma lona Fanau mai; o le mana'o ina ia sili atu le lava saunia atoatoa i mafatiaga o lona alo mo lo tatou fa'aolataga. O le mea lea, ina ua tu'uina atu ai o ia i totonu o le Malumalu, ua ia ofoina mai foi o ia mo i tatou. O le olioli ma le fa'anoanoa ua tu'ufa'atasia i totonu o le fatu o le Tina o le Atua o Lē ua avea ma Tina o i latou uma o e talitonu i lona alo.

FAITAUGA MO LE MASINA O FEPUARI 2020

ASO 9 FEPUARI ASO SA 5 TAUSAGA MASANI:

Faitauga 1: Isaia 58: 7 - 10

Matua: E gafoa mai lou malamalama e pei o le tafa o ata.

Salamo: 112; 4 – 5 (tali), 6 – 7 (tali), 8- 9 (tali)

Tali: E alu a'e le malamalama i le pouliuli mo e ua amiotonu.

Faitauga 2: 1 Korinito 2: 1 – 5

Matua: Na ou tala'i atu ia te outou le mau ia lesu Keriso, o ia lava na fa'asatauroina.

Aleluia, Aleluia... la manuia le tupu o lo'o maluu mai i le suafa o le Ali'i, o le manuia i le lagi, o le vi'iga fo'i i mea aupitoaluga ...**Aleluia.**

Evagelia: Mataio 5: 13 – 16.

Matua: O outou, o le malamalama o le lalolagi outou.



Tofitofiga O le Upu:

Ona o le Sulufaga o le Moliga na patipatia i le vaiaso ua te'a, na tatou lē fa'aogaina ai le amataga o le Lauga i luga o le Mauga fa'atasi ai ma ana Fa'amanuiga ta'uta'ua. Ae tele nisi o fa'amatalaga mai le Lauga o le a tatou fa'alologologo i ai i vaiaso i luma e lu'i ai i tatou ma ia tatou tomanatunatu ai. O upu a lesu ua fuafuaina e lu'itauina ai – e leai ni tala e faigatā pe maoa'e fo'i e uiga i lana gagana – o le fa'atusa o le masima ma le malamalama o lo'o tu'u sa'o mai, o le uiga e mautinoa, so'o se isi e malamalama ai – masima e leai sona tofo po'o le malamalama ua natia lona susulu e lē aogā. I isi vaega o ana a'oa'oga o le a fa'a'ailoa mai ai e lesu o ia o le atamai i le gagana ma le fa'amatalaina o tala a o ia lalaga fa'ata'oto ina ia tapu'e mai ai

Metitasio Aso Sa 9 Fepuari 2020

"O 'Oe o le malamalama o le aso"

Na fa'avaeina le Ekalesia mo le fa'amoemoe e fa'asalalauina atu le Malo o Keriso i le lalolagi uma mo le vi'iga o le Atua le Tamā, ina ia mafai ai e tagata uma ona fetufa'ai i lana fa'aolataga fa'aola, ina aveai ai i latou ma so'otaga e mafai ai e le lalolagi atoa ona ulu atu i se faiā ma Keriso. ... I totonu o le Ekalesia o lo'o i ai ni galuega eseese ae tasi lava le misiona. Na fa'ae'e atu e Keriso i Aposetolo ma o latou sui le tiute o le a'oa'o atu, fa'apaia, ma le pule i lona suafa ma le mana. Ae o le tagatālotu foi e fa'apena ona fetufa'ai tutusa i le tofi ositaulaga, fa'aperofetaga, ma le ofisa mamalu o Keriso ma o le mea lea ua i ai lava le latou sao i le misiona a le nu'u o le Atua i totonu o le Ekalesia ma le lalolagi atoa. Latou te fa'aaogaina foi le galuega fa'a-aposetolo e ala i la latou galuega tu'usa'o i le fa'aevageliaga ma le fa'apa'iaga o tagata, o le fa'a'aulufaleina ma le fa'aatoaotoaina o le galuega fa'aletino e molimau fa'amaoni iā Keriso ma si'itia ai le fa'aolataga o tagata. Talu ai o le tagatālotu, e tusa ai ma o latou tulaga o le soifuaga, e ola i le lololotoi o le lalolagi ma ona popolega, ma ua vala'auina ai i latou e le Atua e fa'aaogā le latou galuega fa'a-aposetolo i le lalolagi e pei o le mea fa'afefete, fa'atasi ai ma le nanamu o le agaga o Keriso.

latou o lo'o fa'alologologo – ma tatou – ma totō le fe'au o le Evagelia i le palapala o tatou loto ma mafaufau, ae o lona tu'u sa'o mai o ana fa'amatalaga i le lua o mataupu o le Evagelia o lo'o fausia ai le tala o le Lauga i luga o le Mauga o lona 'auga atoa lenā. i se va'aiga o le faitauga mai iā Sagato Paulo ia Korinito o lo'o fa'amamafa maia lea manatu. O lo'o finau mai Paulo e lē o se fa'aalialia o se lauga po'o se atamai na ia aumai ai le evagelia i Korinito, ae o le ta'u atu iā i latou o folafolaga a le Atua ma Keriso fa'akoluseina. O Tu Masani Katoliko e lē faitioina pe itagia tu masani o le atamai, ma o le tele o atamamai lelei o le lua afe tausaga ua tuana'i sa a'afia i le fa'amatalaina ma le fa'a'ailoaina o le fa'atuatua Kerisiano i le lalolagi, ae ole fa'atutumuga lava o le 'mana o le agaga' e aumaia tagata ina ia iloaina le Keriso.

O le tagatālotu e maua ai le sa'o ma le tiute fa'a-aposetolo mai le latou mafutaga ma Keriso o le ulu lea; ua tu'ufa'atasia i totonu o le Tino Fa'amisitelio o Keriso e ala i le papatisoga ma fa'amalosia e le mana o le Agaga Paia e ala i le kofilimasio, ua tofia i latou i le galuega fa'a-aposetolo e le Ali'i lava ia ... e lē gata ina mafai ona latou ofoina atu taulaga fa'aleagaga i mea uma latou te faia ae o le a mafai ai foi ona latou molimauina Keriso i le lalolagi atoa. O sakalameta, aemaise lava le Eukalesitia Paia, e feso'otai ma fafagaina ai lena alofa, o le agaga atoa lea o le galuega fa'a-aposetolo.

O lea ituaiga olaga, e manaomia ai pea le fa'aauau o le fa'atino-ga o le fa'atuatua, fa'amoemoe, ma le alofa. Na'o le sulumalama o le fa'atuatua ma le metitasio i le afiga a le Atua e mafai ai e so'o se tagata ona iloa le Atua, o ia ua tatou ola ai, ma gaoioi, ma mautufa'aga ai (Galuega 17:28) O le molimau tonu lava o lo latou olaga Kerisiano ma a tatou galuega lelei e faia i se agaga fa'alelagi e i ai le mana e u'unaia ai tagata e talitonu i le Atua; auā ua fetalai mai le Ali'i, *ia susulu atu lo outou malamalama i fofoga o tagata, ina ia mafai ona latou vi'ia lo outou Tamā oi le Lagi ona o a outou galuega lelei.*

FAITAUGA MO LE MASINA O FEPUARI 2020

ASO 16 FEPUARI ASO SA 6 TAUSAGA MASANI:

Faitauga 1: Sirako 15: 15 – 20.

Matua: Ua le poloa'i mai e ia i se toatasi ia amio leaga o ia.

Salamo: 119: 1 – 2 (tali), 4 – 5 (tali), 17 – 18 (tali), 33 – 34 (tali).

Tali: Amuia e savavali i le Tulafono a le Ali'i.

Faitauga 2: 1 Korinito 2: 6 – 10.

Matua: Matou te tautala atu i le poto o le Atua ua lilo, na tofia e le Atua anamua lava, ina ia tatou manuia ai.

Aleluia, Aleluia...Ua liutinotagata le Upu, sa mau o ia ma i tatou. A o i latou uma o e na talia o ia, na ia avatu i ai lea lava manuia ia avea i latou ma fanau a le Atua ...**Aleluia.**

Evagelia: Mataio 5: 17 – 37.

Matua: Ua outou fa'alogu, na fai mai i e anamua, a o au, ou te fai atu ia te outou.



Tofitofiga O le Upu:

O le Lauga i luga o le Mauga e foliga mai e logo malie ona e fou i le fa'alogu – ua alu sa'o lava ile a'a o le olaga o le tagata i le afio ai o le Atua. O mea na o lo'o fa'anaunau mai ai Iesu – e lē lava na o le lē faia o ni mea leaga, ae o le lē tatau ona e mana'o e faia ni mea leaga. O fa'ata'ita'iga ua ia aumaia – fa'amisa, mulilua, tautō pepelo – e lē o ni mea e maoa'e pe faigatā foi i tagata, ma o fa'asalaga ua ia aumaia e mata'utia. O nei fautuaga mai le Tusi Pa'ia e mafai ona 'ese'ese ni tali mai tagata o lo'o sa'ili le fa'atuatua. I se tasi itū o le lu'itau e mafai ona maoa'e o le a o'o ai i se pagātia – po'o le fa'aleagaina o le tino lava ia. I le isi fo'i itū o lona uiga faigatā o le a ta'ita'ia ai i le musu e faia nisi taumafaiga e pulea ai le tagata lava ia (e le afaina lena, tatou alu e pei ona masani ai). Ua aumai e Iesu se tali uiga 'ese aga'i le agasala – e sili atu le mata'utia pe ā fa'aleagaina o lona taunu'uga e matuiā tele. Ua talosagaina i tatou e Iesu ina ia va'ai i le agasala ma le toto'a – ina ia aua ne'i o tatou fa'anoanoa ai pe mafatia ai, ae ia maitauina le moni ma le afaina ai. O le faitauga muamua o lo'o ofoina mai ni ta'iala mo ni tomanatuga:

'pe a e mana'o i ai tausi poloa'iga' – o lo'o tu'itu'i mai le tusi e mafai ona te'ea le agasala - 'aua le popole. Ae na te le'i tu'uina maia le fa'atanaga i nisi e faia le agasala – lona uiga e lē talia le agasala. E pei ona tatou iloaina- ma e pei fo'i ona a'oa'o manino mai e le fa'atuatuga Kerisiano - ua na o le kalasia a le Atua e mafai ona feagai ma le agasala. E pei ona tatou fa'alologologo so'o i ai, 'O lo'u tino lenei, fa'amaligi mo le fa'amagaloina o agasala.' O le tagata ola e lē mafai ona feagai ma le agasala – ua na o le Atua, ae o le tagata ua vala'auina ina ia talia le kalasia a le Atua e mafaia ona tineia le agasala – e fa'apenā ona 'faia ma le fa'amaoni o lo'o i lou malosi'aga'. O se vaega tāua lenei o le atamai o lo'o talanoa ai Paulo i Korinito (sa lē lauiloa mole tausia o poloa'iga!) O le fe'au kerisiano – le Evagelia – ua fa'aali mai iā i tatou, ma o le Tala Lelei e le fa'apea ona o la e fai mai o le agasala e lē afaina, ae o lo'o fai mai o le agasala – o a tatou agasala – ua faia i ai se tonu. O se vaega o a tatou tali i le Tala Lelei o le maitauina lea o le agasala po'o le a lava ia tatou savali 'ese mai ai.

16

Metitasio Aso Sa 16 Fepuari 2020

Vala'auga ia Fa'asilia le Amiotonu.

Sa lē'i fa'amalieina Iesu i le fa'aumatia o le agasala pe maua foi na'o se aofaiga talafeagai o le alofa tunoa mo lo tatou fa'aolagata. Na tele na'uā mea na ia faia ma o ia lava na folafola mai, *na ou sau ina ia mafai ona latou maua le ola ma ia maua atili ai* (Jn 10:10). O lenei tumu o le olaga o le mau lea i le alofa tunoa, o le ola fa'alelagi lea e mafua ai ona fuga mai le paiaga. O le paiaga e lē'o fa'apolopolo mo ni nai tagata; o Iesu, e ala i lona Liutinotagata ma lona maliu i luga o le koluse, na maua ai le uiga o le fa'aolagata ma le fa'apaia mo i latou uma o e talitonu ia te ia. O la, o le Paia-Uma, na afio

mai e fa'apaia i tatou, ma a'oa'o mai ia i tatou, *O lea e tatau ai ona e atoa'atua e pei ona atoa'atua lo outou Tamā oi le lagi* (Mt 5:48).

E le'i tu'uina atu e Iesu lenei mataupu i se vaega o ni tagata ua filifilia, na te le'i fa'apolopoloina foi mo ona Aposetolo ma ana uo mamae; ae na ia fofolaina atu i le motu o tagata o e na mulimuli ia te ia. Sa talia le feau e Sagato Paulo ma folafola atu i tagata o Nu'uese: *O le mea e finagalo i ai le Atua ia paia tagata uma* (1 Tim 4: 3). Ae o tatou vaitaimi i le Ekalesia ... ua toe fa'amalosia mai ma i le tele o taimi i le lalolagi i nei vaitaimi: "Ua vala'auina e Keri-

so tagata uma ina ia si'itia le maualuga o le ola paia O lo'o i ai pea nisi ua fa'apea mai o le paiaga e lē se tofiga mo tagata uma, ma ua vala'auina tagata uma ia latou maua ... Ua tu'uina mai e Iesu Keriso ia lava e fai ma fa'ata'ita'iga mo tagata uma ina ia fa'aa'oa'o i ai." "Aua nei talitonu se tasi o le paiaga e mo ni nai tagata ua filifilia, ae o isi tagata uma e ono fa'atapula'a le fa'aitiitia i lea vituti" E le'i afio mai Iesu na ona lavea'i a'u, ae na ia fa'apaia foi a'u. O lo'o vala'au o ia ia 'ou paia ma ia aogā ia te a'u kalasia uma e manaomia ina ia 'ou mauaina ai.

FAITAUGA MO LE MASINA O FEPUARI 2020

ASO 23 FEPUARI ASO SA 7 TAUSAGA MASANI:

Faitauga 1: Levitiko 19: 1 – 2, 17 – 18.

Matua: E te alofa atu i lē lua te tua'oi ia pei o oe lava ia te oe.

Salamo: 103: 1 – 2 (tali), 3 – 4 (tali), 8, 10 (tali), 12 – 13 (tali).

Tali: E alofa mutimutivale ma alofa fua mai le Ali'i.

Faitauga 2: 1 Korinito 3: 16 – 23

Matua: O mea uma lava e a outou ia; e o Keriso foi outou, e o le Atua fo'i Keriso.

Aleluia, Aleluia... O au afioga o le agaga ia, o le ola fo'i ia; o ia te oe upu o le ola e fa'avavau ...
Aleluia.

Evagelia: Mataio 5: 38 – 48

Matua: Ia outou alolofa atu i e ua ita mai ia te outou.



Tofitofiga O le Upu:

'O le poto o lenei lalolagi o le valea lea i luma o le Atua' na tusi ai Paulo i Korinito – o lo'o aumai fa'atasi ai ma le manatu o le poto a le Atua o le valea lea a le lalolagi. Ma e fa'apenā se va'aiga – o le mafua'aga lenā i le tele o taimi tatou te faia e pei ona faia e le lalolagi ae lē pei ona finagalo ai le Atua mo tatou. O le 'mata i le mata ma le nifo i le nifo' o lo'o ta'u mai ai o le taui atu e lē afaina. Ae o Levitiko ma lesu o lo'o 'ese le finau. O le tusi a Levitiko e matele i le Tulafono o lo'o tu'uina maia le anoano o mataupu e uiga i Tulafono, fa'apea le tele o faitauga i tulafono fa'atonutonu ma poloa'iga – ae o lo'o fa'avae uma i le Tulafono fa'atauva'a i le amataga o le faitauga o le asō: 'Ia pa'ia outou; auā o a'u o le Ali'i lo outou Atua e pa'ia lava a'u.' O le va feagai ai a le Atua ma tagata o le Atua e lē na o le usita'i i poloa'iga, ae ia pei o le Atua – ia pa'ia ona o le Atua e pa'ia – o le vala'au lea mo tagata a le Atua. E fa'apea fo'i le faitauga mai iā Mataio. Ua avatu e lesu ni fa'ata'ita'iga maoa'e e fa'ata'ita'i i ai ma e foliga e fa'avalevlea i

tulaga tau i le atamai fa'alalolagi nei, ae sa ia fa'apea mai: 'Ia atoatoa ona lelei o la outou amio, e pei o lo outou Tamā o i le lagi e atoatoa ona lelei.' O lo'o manino lelei mai o se poloa'iga fa'apea nei e lē faigofie i le fa'aletagata – ma le upu 'Atua' o le a mou atu lona uiga pe afai e i ai isi e tutusa o latou lelei atoatoa. O le vala'au mai faitauga e tolu ina ia maitauina o latou e totino i le Atua ua vala'auina ina ia va'aia ma faia e pei o le natura o le Atua – ma o le natura o le Atua o le pa'iaga ma le foa'i atoa o ia lava. O nā uiga lelei e lē o ni vaega ia o le poto a le lalolagi – ma o le mafua'aga lea ua fa'amamafa so'o mai ai e le Tusi Pa'ia, ma mafua'aga fo'i o se poloa'iga fai so'o mo latou o le a avea ma so'o. O le mafua'aga tatou te tomanatu ai i le ola ai i se olaga fa'apea ona o le fa'atuatua ua fautuaina ai i tatou – e pei ona fai mai ai Paulo - 'O le Agaga o le Atua o lo'o iā te outou.' I le fa'asoaina o le Agaga, ua tatou fa'atasi ai ma le Atua, ma o le vala'auina i le pa'iaga ma le lelei atoatoa e mafai ona taliaina.

17

Metitasio Aso Sa 23 Fepuari 2020

"Ia ato'aatoa ona lelei"

O nei upu e lu'itauina ai i tatou uma, i le avea ai ma so'o o le Ali'i O le fa'ata'ita'i i le ola paia ma le ato'aatoa o le Atua, atonu e foliga mai e lē mafai ona ausia ... Ae 'a'ua nei galo iā i tatou a aunoa ma le Agaga Paia e leai se aogā o taunu'uga uma. O le paiaga fa'a-Kerisiano e lē o le amataga ma le autū o a tatou galuega, ae o le fua o le amio lelei – fa'ananau ma totōina - i le Agaga o le Atua e fa'atolu lona paia.

I le Evagelia, ua fetalai mai lesu ia i tatou i le paiaga, ma fa'amalamalama mai ia i tatou le tulafono fou, o lana tulafono. Na ia faia lenei mea e ala i le fa'atusatusaga

o le fa'amasinoga lē ato'aatoa a le au tusiupu ma le au faresaio ma le fa'amasi-noga sili o le Malo o le Atua. O le eseese muamua o lenei fuaiupu e fa'atatau i le tauimasui. Ua e iloa e pei ona fai mai: "Mata i le mata ma le nifo i le nifo." Ae ou te fai atu ia te oe ... afai e pō mai se tasi i le alafau taumatau, ia e ofoina atu foi i ai le isi. E lē gata ina tatou mana'omia le 'aloese mai le tauimasui i mea leaga ua latou faia ia i tatou, ae ia saili le agalelei e faia ai mea lelei mo i latou. O le eseese lona lua e fa'atatau i o tatou fili: "Ua e iloa e pei ona ta'ua. Ae ou te fai atu ia te oe: alofa i ou fili ma tatalo mo i latou o e fa'asauā iā te oe." Na fesili lesu ia i latou o e na mulimuli ia te ia e alolofa atu iā i latou e lē tatau ai, e aunoa ma se fa'amoemoe i se taui, loto,

mafutaga, aiga, nu'u ma le lalolagi atoa

E le'i afio mai lesu e a'oa'o mai i tatou ia amio lelei, pe fa'apefea ona teu le amio i luga o le laulau! Afai o lea, semanū e lē tatau ona ou alu ifo mai le lagi ma maliu i luga o le koluse. Na afio mai Keriso e lavea'i i tatou, ma fa'ailoa mai le ala, pau lava lea o le ala e 'aloese mai ai i le oneone-mimiti o le agasala, ma o lena le ala i le paiaga o le alofa tunoa, o le alofa tunoa na ia fa'aalia, ma fa'ailoa mai i aso uma ia i tatou. O le avea ma sagato/sagata e lē o se olaga mau i tamaoiga. Ae tatau mo le fa'aolataga o le lalolagi. O le mea lea o lo'o finagalo i ai le Alii mo i tatou.



FAITAUGA MO LE ASO SA MUAMUA O MATI 2020

ASO 1 MATI ASO SA MUAMUA O LE FAGAFULU:

Faitauga 1: Kenese 2: 7 – 9; 3: 1 – 7

Matua: O le ulua'i tagata. O le agasala muamua.

Salamo: 51: 1 – 2 (tali), 3 O 4 (tali), 10 – 11 (tali), 12 – 15 (tali). Tali: Le Ali'i e, alofa mai, auā ua matou agasala.

Faitauga 2: Roma 5: 12 – 19. Matua: Ua silisili lava le alofa tunoa, ina o fa'ateleina le agasala.

FUAIUPU O LE EVAGELIA: E lē na o mea e 'ai e ola ai le tagata, a o afioga uma e tulei mai i le fofoga o le Atua.

Evangelia: Mataio 4: 1 – 11.

Matua: Na fa'alaina Iesu i po e fagafulu ma ao e fagafulu.

FA'ASOLOGA O MISASA SAMOA MO FEPUARI 2020

1st. Sunday 2 Fepuari 2020	2.00 pm	Malumalu i Petone	Patele Maleko
		Misasa Kapelanisia	Patele Andrew
			Patele Tuli
	2nd. Sunday 9 Fepuari 2020		
	11.30 am	Naenae	Patele Maleko
	12.00 pm	Taita	Patele Tuli
	3rd. Sunday 16 Fepuari 2020		
	11.00 am	Wainuiomata	Leai se misasa
	11.00 am	Newtown	Patele Tuli
	11.30 am	Porirua	Patele Andrew
	4th. Sunday 23 Fepuari 2020		
	11.00 am	Lower Hutt	Patele Maleko
11.30 am	Stokes Valley	Patele Tuli	

18

FEPUARI KALENA



Aso Sa 2 Fepuari: Misasa Amata Kapelanisia malumalu i Petone @ 2:00pm



Aso Tofi 6 Fepuari: WAITANGI DAY



Aso Faraile 7 Fepuari: Fonotaga Kapelanisia @ 6.30pm



Aso Faraile 14 & 15 Fepuari: Fa'anoanoa Faia'oga Aso Sa



Aso Lulu 26 Fepuari: Aso o le Lefulefu (Ash Wednesday)

Mikaele Teofilo:



m.teofilo@wn.catholic.org.nz



+64 4 496 1707



021 0818 5037



PO Box 1937, Wellington 6140, New Zealand